

學海類編

第四十六冊



明倭寇始末

清 豐潤谷應泰霖蒼編

明代沿海倭亂劇於中葉然先已不時告警可鑑也洪武二年夏四月時倭寇出沒海島中數侵掠蘇州崇明殺略居民劫奪貨財沿海之地皆患之太倉衛指揮僉事翁德帥官軍出海捕之遇于海門之上幫及其未陣麾兵衝擊之斬獲不可勝計生擒數百人得其兵器海艘命擢德指揮副使其官校賞綺幣白金有差仍命德領兵往捕未盡諸寇

三年三月遣萊州同知趙秩持詔諭日本國王良懷令
革心歸化日本古倭奴國在東海中綰波而宅自元
菟樂浪底于徐聞東筦所通中國處無慮萬餘里國
君居山城所統五畿七道三島爲郡五百七十有三
然皆依水附嶼大者不過中國一村落而已戶可七
萬課丁八十八萬三千有奇自元帥討日本者没于
水不得志日本亦不復來貢至是帝遣使諭降之
四年冬十月癸巳日本國王良懷遣其僧祖朝來進表
箋貢馬方物并僧九人來朝又送至明州台州被掠

男子七十餘人詔賜文綺答之十二月詔靖海侯
吳禎籍方國珍所部溫台慶元三府軍士及蘭秀山
無川糧之民嘗充船戶者凡十一萬一千七百餘人
隸各衛爲軍仍禁兵海民不得私出海時國珍餘黨
多入海剽掠故也禎既至三郡每挾私意多引平民
爲兵瀕海大擾甯海知縣王士宏曰吾甯獲死罪不
可誣良民爲兵卽上封事詞甚切上立罷之

六年春正月德慶侯廖永忠上言今北邊遺孽遠遁萬
里之外獨東南倭寇負禽獸之性時出剽掠擾瀕海

學海類編 卷之二
之民陛下命造海舟剪捕此寇以奠生民德至盛也
然臣竊觀倭彝竄伏海島因風之便以肆侵略來若
奔狼去若驚鳥臣請令廣洋江陰橫海水軍四衛添
造多櫓快船令將領之無事則沿海巡徼以備不虞
倭來則大船薄之快船逐之彼欲爲內寇不可得也
上從之

七年夏六月倭寇膠海靖海侯吳禎率沿海各衛兵捕
至琉球大洋獲倭寇人船俘送京師

十三年春正月胡惟庸謀叛約日本令伏兵貢艘中會
事覺悉誅其卒而發僧使于陝西四川各寺中示後
世不與通

十七年春正月倭類寇浙東命信國公湯和巡視海上
築山東江南北浙東西海上五十九城咸置行都司
以備倭爲名

二十年二月置兩浙防倭衛所 夏四月戊子命江夏
侯周德興往福建福興漳泉四郡視要害築海上十
六城籍民爲兵以防倭寇增置巡檢司四十有五分
隸諸衛

二十二年冬十二月倭寇甯海尋犯廣東

二十七年春二月倭寇浙東命都督楊文劉德商嵩巡視兩浙復命魏國公徐輝祖安陸侯吳傑往浙訓練海上軍士同楊文等防倭 秋八月命吳傑同永定侯張全往廣東訓練海上軍士防倭 冬十月倭寇

金州

三十一年春二月倭寇山東浙東

永樂元年日本王源道義遣使入貢賜冠服文綺給金印

四年冬十月平江伯陳瑄督海運至遼東舟還值倭于沙門追擊至朝鮮境上焚其舟殺溺死者甚眾

九年春正月丙戌命豐城侯李彬平江伯陳瑄等率浙江福建舟師勦捕海寇 三月中軍都督劉江守遼東不謹斥候海寇入寨殺邊軍上怒遣人斬江首既而宥之使圖後效 夏五月倭寇浙東

十四年夏五月敕遼東總兵都督劉江及緣海衛所備倭寇相機勦捕 命都督同知蔡福等率兵萬人于山東沿海巡捕倭寇六月倭舟三十二艘泊靖海衛

楊村島命福等合山東都司兵擊之 十二月置遼東金州旅順口望海塢左眼右眼三手山西沙洲山頭爪牙山敵臺七所

十五年春正月倭寇浙江松門金鄉平陽 冬十月遣禮部員外郎呂淵等使日本先是帝命太監鄭和等齎賞諭諸海國日本首先歸附詔厚賚之封其鎮山賜勘合百道與之期期十年一貢無何捕倭寇將士寇數十俘獻京師俱日本人羣臣請誅之以正其罪上乃遣淵賜敕切責之

十七年夏六月遼東總兵都督劉江大破倭寇于望海塢先是江巡視各島至金州衛金線島西北望海塢其地特高廣可駐兵千餘詢諸土人云洪武初都督耿忠亦嘗于此築堡備倭離金州城七十餘里凡寇至必先經此實濱海咽喉之地疏請用石壘堡置烟墩瞭望上從之一日瞭者言東南夜舉火有光江計寇將至亟遣馬步官軍赴塢上堡備之翼日倭寇二千餘乘海舶直逼塢下登岸魚貫行一賊貌醜惡揮兵率眾勢銳甚江令犒師秣馬略不爲意以都指

揮徐剛伏兵于山下百戶江隆帥壯士潛燒賊船截其歸路乃與之約曰旗舉伏起鳴炮奮擊不用命者以軍法從事既而賊至塢下江被髮舉旗鳴砲伏盡起繼以兩翼竝進賊眾大敗死者橫朴草奔餘眾奔櫻桃園空堡官軍追圍之將士奮勇請入堡勦殺江不許特開西壁以待其奔分兩翼夾擊之生擒數百斬首千餘閒有脫走舶者又爲隆等所縛無一人逸者凱還將士請曰將軍見敵意思安閒惟飽士馬及臨陣作真武披髮狀迨賊入堡不殺而縱之何也江

曰窮寇遠來必勞且飢我以逸飽待飢勞固治敵之道賊始魚貫而來爲蛇陣故披髮作此狀以鎮服之所以愚士卒之耳目作士卒之銳氣賊旣入堡有死而已我師攻之彼必致死未必無傷寇出縱其生路卽圍師必缺之意此固兵法顧諸君未察耳事聞上賜敕褒進封江廣甯伯子孫世襲將士賞賚有差先是元末瀕海鹽起張士誠方國珍餘黨導倭寇出沒海上焚民居掠貨財北自遼東山東南抵閩浙東粵濱海之區無歲不被其害至是爲江所挫斂跡不敢

大爲寇然沿海稍稍侵盜亦不能竟絕

正統四年夏四月倭寇浙東先是倭得我勘合方物戎器滿載而東遇官兵矯云入貢我無備卽肆殺掠貢卽不如期守臣幸無事輒請俯順倭情已而備禦漸疏至是倭大舉入桃渚官庾民舍焚劫驅掠少壯發掘冢墓束嬰孩竿上沃以沸湯視其啼號拍手笑樂得孕婦卜度男女刳視中否爲勝負飲酒積骸如陵于是朝廷下詔備倭命重師守要地增城堡謹斥堠合兵分番屯海上寇盜稍息

嘉靖二年五月日本諸道爭貢大掠甯波沿海諸郡邑鄞人宋素卿者初奔日本正德六年與其國人源永壽來貢其從父澄識之告素卿附倭狀守臣以聞置不問至是其主源義植幼闇不能制命羣臣爭貢各強給符驗左京兆大夫內藝興遣僧宗設右京兆大夫高貢遣僧瑞佐及宋素卿先後至甯波爭長不相下故事番貨至市舶司閱貨及晏坐竝以先後爲序時瑞佐後而素卿狡賄市舶太監先閱佐貨宴又坐設上設不平遂與佐相仇殺太監又以素卿故陰助

佐授之兵器而設眾強拒殺不已遂燬嘉賓堂劫東庫遂瑞佐及餘姚江佐奔紹興設追之城下令縛佐出不許乃去沿途殺掠至西霍山洋殺備倭都指揮劉錦千戶張鏜執指揮袁進百戶劉恩又自育玉嶺奔至小山浦殺百戶胡源浙中大震設負固據海粵巡按御史歐珠鎮守太監梁瑤奏聞逮素卿下獄待詆倭自是有輕中國心矣 給事中夏言上言倭患起于市舶遂罷之初太祖時雖絕日本而二市舶司不廢市舶故設太倉黃渡尋以近京師改設福建浙

江廣東七年罷未幾復設蓋以遷有無之貨省戍守之費禁海賈抑姦商使利權在上也自市舶內臣出稍稍苦之然所當罷者市舶內臣非市舶也至是因言奏悉罷之市舶罷而利權在下奸豪外交內訶海上無甯日矣

四年二月宋素卿伏誅初宗設遁海島不獲獨素卿及瑞佐下獄會朝鮮兵徼海者得其魁仲林望古多羅等三十三人國王李懌奏獻闕下於是發仲林等至浙責與素卿對簿備鞫遣貢先後及符驗真偽既悉

有司以爰書上請乃論素卿死釋瑞佐還本國
十八年國王源義植復以修貢請許之期以十年人無
過百船無過三然諸夷嗜中國貨物人數恆不如約
至者率遷延不去每失利云

二十五年倭寇甯台自罷市舶後凡番貨至輒主商家
商率爲奸利負其責多者萬金少不下數千索急則
避去已而主貴官家而貴官家之負甚于商番人近
島坐索其負久之不得乏食乃出沒海上爲盜輒搆
難有所殺傷貴官家患之欲其急去乃出危言撼當

事者謂番人泊近島殺掠人而不一兵驅之備倭
固當如是耶當事者果出師而先陰洩之以爲得利
他日貨至且復然如是者久之倭人恨言挾國主貲
而來不得直曷歸報必償取爾金寶以歸因盤據島
中不去竝海民生計困迫者糾引之失職衣冠士及
不得志生儒亦皆與通爲之鄉道時時寇沿海諸郡
縣如汪五峰徐碧溪毛海峰之徒皆華人僭稱王號
而其宗族妻子田廬皆在籍無恙莫敢誰何巡按浙
江御史陳九德請置大臣兼巡浙福海道開軍門治

兵捕討聽以軍法從事從之乃以朱統爲右副都御史巡撫浙江兼攝福興泉漳未至而泊甯波台州諸近島登岸攻掠諸郡邑無筭官民廨舍焚燬至數百千區巡按御史裴紳劾防海副使沈瀚守土參議鄭世威因乞救統嚴禁泛海通番勾連主藏之徒從之統乃下令禁海凡雙檣餘艘一切毀之違者斬乃日夜練甲兵嚴糾察數尋舶盜盜淵藪破誅之因上言去外盜易去中國盜難去中國羣盜易去中國衣冠盜難遂鐫暴貴官家渠魁數人姓名請戒論之不報

於是福建海道副使柯喬都司盧鏜捕獲通番九十餘人以上統立決之於演武場一時諸不便者大譁蓋以時通番浙自甯波定海閩自漳州月巷大率屬諸貴官家咸惴惴重足立相與詆誣不休諷御史周亮給事中葉鏜奏改統爲巡視未幾統復上言長嶼諸處大俠林參等號稱刺達總管勾通倭舟入港作亂更有巨奸控造舢舨走賊島爲鄉導躡海濱鞠論明確宜正典刑章下兵部侍郎詹榮覆奏中國待外裔不以向背責之以昭天地之量統所論坐俱關重

乞下都察院覆覈從之于是御史周亮等劾執注措乖方專殺啓釁因及福建防海副使柯喬都指揮使盧鏜黨執擅殺宜置于理帝遂奪執官命還籍聽理遣給事中杜汝禎往福建會巡按御史陳宗夔訊喬等併覈執事汝禎宗夔勘執聽信奸回柯喬盧鏜擅殺無罪皆當死奏下兵部尙書丁汝夔如其議上帝從之命喬鏜繫福建按察司待決執恚自殺士論惜之遂罷巡撫御史不復設

二十年夏四月浙江巡按御史董威宿應參前後請寬海禁下兵部尙書趙錦覆議從之自是舶主土豪益自喜爲奸日甚官司莫敢禁

三十一年夏四月倭寇犯台州破黃巖大掠象山定海諸邑汪直者徽人也以事亡命走海上爲舶主渠魁倭人愛服之倭勇而戇不甚別死生每戰輒赤體提三尺刀舞而前無能捍者其魁則皆浙閩人善設伏能以寡擊眾大羣數千人小羣數百人而推直爲最徐海次之又有毛海峰彭老生不下十餘帥列近洋爲民害至是登岸犯台州破黃巖四散象山定海諸

處猖獗日甚知事武偉敗死浙東騷動 秋七月廷
議復設巡視重臣以都御史王忬提督軍務巡視浙
江海道及與洋泉地方忬巡撫山東聞命卽日至浙
度所治軍府皆草創而浙人柔脆不任戰所受簡書
輕不足督率吏士乃上疏請假事權誅賞得便宜且
欲嚴內應之律寬損傷之條勦撫勿拘從之改巡視
爲巡撫忬乃任參將俞大猷湯克寬爲心膂徵狼土
諸兵及募溫台諸下邑桀黠少年分隸諸將布列瀕
海各鎮堡嚴督防禦浙人恃以無恐云

三十二年春三月王忬破倭于普陀諸山初忬廉知俞
大猷湯克寬材勇旣虛己任之而都指揮盧鏜坐前
都御史朱統事尹鳳坐贓累俱繫獄忬知其能奏釋
之以爲別將亦募兵分帥之日犒撫激勵欲得其死
力倭寇汪直等結砦海中普陀諸山時出近洋襲官
軍忬偵知之乃夜遣俞大猷帥銳兵先發而湯克寬
以巨艘佐之徑趨其砦縱火焚之倭倉皇免餘艘走
官軍隨擊大破之斬首一百五十餘級生獲一百四
十三人焚溺死者無筭值颶風發兵亂汪直等乘閒

率眾逸去都指揮尹鳳復以閩兵邀擊於表頭北茭
諸洋斬首百餘級生獲二百餘人先後以捷聞賜白
余文綺有差 夏四月汪直毛海等既潰散剽忽往
來不可測溫台甯紹俱羅其患參將湯克寬率兵循
海堧護城堡捕奔軼斬獲亦相當于是賊移舟而北
犯蘇松郡二郡素沃饒賊至捆載而去有蕭顯者尤
桀狡率勁倭四百餘屠上海之南匯川沙逼松江而
軍餘眾圍嘉定太倉所過殘掠不可言王忬遣都指
揮盧鏜倍道掩擊斬蕭顯餘眾復奔入浙俞大猷等

邀殺殆盡先是吳浙閒人習選悞而文武大吏復不
能以軍法繩下遂至破昌國臨山鄞衢乍浦青村柘
林吳松江諸衛所圍海鹽平湖餘姚海甯上海太倉
嘉定諸州縣忬不欲冒功有所隱沒隨擊走之計倭
所得亦不償失前後俘斬共三千餘級東南賴之
五月給事中賀涇奏畱都根本重地海洋密邇鎮江
京口乃江淮咽喉瓜埠儀真又漕運門戶請設總兵
駐鎮江從之 秋七月太平府同知陳璋敗倭于獨
山斬首千餘餘眾浮海東遁 冬十月倭寇太倉州

學海類編
攻城不克分掠鄰境有失舟倭三百人突至平湖海甯等縣自獨山之敗倭東遁江南稍甯惟崇明南泊失風者凡三百人不能去總兵湯克寬及僉事任坏畱兵守之坏屬兵三百皆新募勵以必死不入與家人訣爲書赴之而去親介胄臨陣士無敢不用命者坏敝衣芒履與士雜行伍依草舍閒嚙繡飲水同甘苦至是相守不下賊潛出沒坏常夜追之出其前後宰夫佩恐有失衣坏衣介馬而馳故賊不知所取坏嘗匿溝中賊過之不知匿至明士始得之又遇矢石

士以死捍坏坏被傷之至水濱梁已徹丈餘超而過追急宰夫畱禦之死焉坏求其首爲流涕親酬之相拒數月不克克寬復督邳漳等兵擊之敗績死亡四百人官軍疫不能攻乃開壁東南陬倭遂潰圍出掠蘇松各州縣百餘人由華亭縣滌缺登岸流劫至木涇金山衛移舟泊寶山克寬引舟師迎擊及於高家觜毀其舟斬七十三級生擒十四人倭別隊失風至興化殺千戶葉臣卿知府黃士宏指揮張擊殲之時沿海諸奸民乘勢流劫眞倭不過十之二三

十三年三月倭自太倉潰圍出乃掠民舟入海趨江北大掠通州如皋海門諸州縣復焚掠鹽場有漂入青徐界者山東大震 改王忬爲右副都御史巡撫大同以徐州兵備副使李天寵代之忬在浙江荐盧鏜釋柯喬激勵諸將鄧城劉堂孫敖等爭奮逐北以死綏著節復廣爲偵刺凡沿海大猾爲倭內主者悉繫之按覆其家自是倭不復知中國虛實與所從向往而餘艘在海中者亦無以菽粟火藥通往食食盡自遁又行視諸郡邑未城者計寇緩急次第城之凡

三十餘所杭州官吏以烽火不時發日集坊民登陴守多怨苦忬曰吾斥堠明無慮勿及余何先敵受困耶令罷之一郡皆歡至是去以徐州兵備副使李天寵爲僉都御史代忬忬去而浙復不甯矣初忬荐盧鏜爲參將鎮閩閩人故忌鏜劾鏜兇險不可用罷之而沿海大猾且言忬令大猷搗巢非計欲搖動忬忬不爲動已而南京各官復荐鏜乃用鏜爲參將而以俞大猷爲浙直總兵以南京兵部尙書張經總督浙福南畿軍務時朝議方徵狼土兵剿倭以經嘗總督

學海類編 卷之三
兩廣有威惠爲狼土所戴服故用之敕令節制天下
之半便宜從事開府置幕自辟參佐經亦慷慨自負
中外忻然謂倭寇不足平 夏四月倭寇自海鹽趨
嘉興參將盧鏜禦之稍卻次日復戰於孟宗堰伏發
殺官軍四百人溺死無算都司周應禎等死之賊乘
勝入據石界由分兵四掠攻嘉興府城副使陳宗夔
帥兵禦卻之焚其舟賊遯入乍浦與長沙灣寇合犯
海甯諸縣既而東掠入海至崇明夜襲破莫城知縣
唐一岑死之倭自崇明進薄蘇州大掠六月倭自吳

江掠嘉興都指揮夏光禦之背王江涇而陣倭鼓譟
而前我兵大潰光急入舟中流矢溺死蘇州倭寇至
嘉善轉掠松江出海總兵俞大猷擊敗之于吳松所
擒七人斬二十三級八月倭寇自嘉興還屯採淘港
柘林諸處進薄嘉定會募兵參將李逢時許國以山
東民槍手六千人至與賊遇于新涇橋逢時率麾下
先進敗之賊退據羅店官軍追及之斬八十餘人許
國恨逢時與同事不約已乃別從閒道擊賊欲分逢
時功追至採淘港乘勝深入伏起大潰溺水死者千

人指揮劉勇等死之工部侍郎趙文華上言倭寇猖獗請禱祀東海以鎮之帝命往祀兼都察沿海軍務文華至浙凌轢官吏公私告擾益無甯日
三十四年柘林倭奪舟犯乍浦海甯攻陷崇德轉掠塘西新市橫塘雙林烏鎮菱湖諸鎮杭城數十里外流血成川巡撫李天寵束手無策惟募人縋城自燒附郭民居而已張經駐嘉興援兵亦不時至副使阮鶚僉事王詢竭力禦之僅免失陷致仕僉都御史張濂目擊時事痛之乃上言臣本杭人頃復家居五載頗

知海寇始末始以海禁乍嚴遂至猖獗而督撫因循玩愒養成賊勢夫堂堂會城閉門旬日已有垂破之勢徒以意得志滿而去更無一兵一旅阻其去來賊寇野心欲如谿壑能保其不復至哉臣恐其賊退之後人復收拾傷殘首級虛張功次以欺陛下仍有從而庇之者則罰罪之典又移而爲賞功之命矣臣寓父母之邦同舟共濟志惟切于報君嫌何遊于出位敢以三策爲陛下陳之一曰重軍法以作積弱之氣七惟力戰而後克敵亦惟畏法而後力戰今江南非

無義勇也迎敵九死退走十生何怪其有退而無進哉軍法之行不在行陣而在平時誠得必死之士萬夫海寇百萬不足平矣一日選民兵以收必勝之功夫江南衛所已成虛設地方有急輒假外兵糊口而來原非義勇掉臂而去莫可勾查臣愚以爲莫如盡散調募之兵專責州縣立保伍更番較閱期于不擾一遇有警按籍而呼共保身家寇小至則率眾以攻之大至則堅壁以守之一日復海市以散從賊之黨夫海市舊制原非創設向使瀕海之軍衛如故則市

舶未害爲也惟武備日弛不能制變而後海禁漸嚴倭寇乏食海寇由之以起惟軍民旣練寇掠則懼遭斬獲交易則可保首領彼雖至愚必不以彼易此然後相機稍復海市之舊不惟散已聚之黨而瀕海窮民假此爲生又足以收未潰之人心 夏四月廣西田州土官婦瓦氏引狼土兵至蘇州總督張經分隸總兵俞大猷等殺賊時倭據川沙窪柘林爲巢經冬涉春新倭日至地方甚恐聞狼兵至人心稍安賊分眾三千過金山衛俞大猷遣游擊白汝及瓦氏兵邀

之稍有斬獲趙文華至松江因爲狼兵可用厚犒之使擊賊至漕涇遇倭數百人戰不勝頭目鍾富黃維等十四人俱死身亡甚眾於是賊知狼兵不足畏復縱掠如故倭犯江北淮揚諸處前後由通州之餘東場海門之東夾港登岸流劫狼山利河諸鎮呂四餘西諸場復突入通州南門燒民屋二十餘間而去三丈浦倭賊分掠常熟江陰村鎮兵備任坏督保靖上兵及知縣王秩統兵三千攻其巢破之賊奔江陰川沙窪駕舟出海官兵縱火焚其巢賊兵一至戚家

墩游擊白汝劉恩邀獲之江陰賊亦出江東遁五月張經破倭於王江涇還經及巡撫都御史李天寵俱下詔獄論死初經至浙中用將佐何啣沈希儀輩名位已抗驕不爲用而新拔士又慄猾不任兵所徵田州兵瓦氏山東槍手俱不受律連戰敗衄望大損侍郎趙文華出視師頤指凌經經自以大臣位出文華上文華恚則連疏劾經謂其才足辦賊特以閩人避賊讎故縱賊耳帝大怒會臺諫亦有言者趣官校逮捕經時倭寇自柘林犯嘉興經遣參相盧督鏜狼

土兵水陸攻之大敗賊于石塘灣賊北走平望俞大猷邀擊奔平望至王江涇水順宣慰官舍彭翼南攻其前保靖宣慰使彭盡臣躡其後遂大敗之斬首二千級溺死者稱是餘眾奔柘林縱火焚其巢駕舟二百餘艘出海遁自有倭患來此為戰功第一而文華論經之疏已上矣捷聞兵科言宜畱經平倭以自贖不聽并李天寵湯克寬俱逮至京以縱寇論死文華既疏劾經奏以巡按御史胡宗憲為僉都御史代天寵巡撫而以周琬代經未幾復罷琬以南京戶部侍

郎楊宣為總督倭寇自海洋突犯蘇州南京都督周于德來援一戰而敗鎮撫蘇憲臣被殺賊中分其眾一由齊門撞馬頭而北轉掠澣墅關長洲五都地一由胥門木櫛而南轉掠吳縣橫鎮葛延嘗熟江陰無錫之境出入太湖莫能禦者御史屠仲律上言宜守平陽港拒黃花澳據海門之險則不得犯溫台塞甯海關絕湖口灣遏三江之口則不得窺甯紹扼養子門則不得近杭州防吳淞江備劉家河則不得掩蘇松嘉興責江南守令以訓練土兵保全境內為殿

學海類編
最沿海沙氏鹽徒及打生手宜收錄併力禦賊詔從
之 川沙寇倭賊犯閘港周浦僉事董邦政遊擊周
藩擊之遇賊驚潰藩被創死賊屯石塘橋流劫崑山
石浦六月倭寇蘇常諸縣嘗熟知縣王秩江陰知縣
錢鏞及居鄉參政錢泮各督士民出禦力屈死之旋
復寇蘇州民爭入城門不啓號呼震野乘陣者望之
嘆攀援者上又縋絕而下任環還自儀真曰奈何坐
視之縱有規謀我在無患也乃出辟門令男女以列
進所活蓋數萬人復率解明道兵江城力戰賊退入

太湖遣舟師邀之乃棄所獲逸去坏以功進副使坏
復擊賊馬跡山圍逃倭嘉定民家投火爇之盡死既
而坏有親喪詔留之任事如故 八月倭賊百餘自
上虞爵谿所登岸犯會稽高埠奪民居據之知府劉
錫千戶徐子懿圍之賊潛縛木筏由東河夜渡潰圍
而出居鄉御史錢鯨遭於鯉浦見殺賊自杭州西掠
於潛昌化至處州淳安以浙兵迫急突入歙縣流劫
至南陵趨太平操江兵扼之賊引而東犯江甯鎮指
揮朱襄率勇士數百人御之是時賊已至板橋襄等

不知方袒裼縱酒突遇盡爲所殲遂由安德鳳臺夾岡沿鄉搶掠趨秣陵關時應天府推官羅節卿指揮徐承宗率兵千人守關望風奔潰賊過關而去自南京出秣陵流劫溧水溧陽趨宜興無錫一晝夜奔一百八十里至澣墅關南直巡撫曹邦輔慮與柘林賊合且爲大患乃親督兵備王崇古會集各部兵扼其東路四面蹙之隨地與戰親召僉事董邦政指揮樓宇以沙兵助勦一戰斬首十九級賊始卻奔吳舍欲走太湖覺之追及于楊家橋盡殲其眾賊自紹興高

流劫杭嚴徽甯太平都犯南六埠七十八人經行數千里殺傷無慮四五千人歷八十餘日始滅邦輔以捷聞歸功僉事邦政時趙文華聞寇且滅欲攘功急趨赴之比奏則邦輔已先之文華怒會柘林賊進據陶家港文華乃悉簡浙兵得四千人文華及胡宗憲親將之營於松江之磚橋約邦輔以直兵會勦浙兵分四道直兵分三道東西竝進賊悉銳衝浙兵諸營皆潰損失軍十千餘人直兵亦陷賊伏中死者二百餘人賊勢大張文華恨邦輔至是乃以罪委之及僉事

學海類編 卷之三
事功
邦政詔下邦政總督逮問既而刑科給事中孫濬言
後期之罪不在直兵今蘇松士民交稱邦輔實心任
事而流劫畱都之倭又爲邦輔所滅功績顯然遽請
罪斥文華非是兵科給事中夏拭亦言之上乃申飭
文華秉公視師以圖大效已而邦政及指揮樓宇賞
竟不及文華惡之也邦輔旋亦謫戍邊巡按直隸御
史張雲路爲論奏不報 十一月止徵狼土諸兵土
兵瓦氏等至浙驕悍不受約束所過殘掠百姓苦之
於是總督楊宜力請止徵從之命兩廣督臣隨路止

之 閏十一月給事中孫濬上言防倭諸臣既有巡
撫總兵又有總督及都察院重臣事權不一牽掣靡
定迄無成功兵部覆奏諸臣職守督察主竭忠討寇
實覈布聞總督主徵集官兵指授方略巡撫主設理
軍務措置糧餉總兵主設法教練身親戰陣至于有
司責在保安地方固守城隍帝然之命行諸臣各遵
敕諭施行 十二月趙文華疏乞還京許之文華初
奉命至浙適狼兵瓦氏等至知倭厚畜銳意請戰文
華惑之亟趨張經進戰不得則上書痛詆經被逮代

經者周琬楊宜皆無遠略賊勢益熾及瓦氏戰敗攻
陶宅餘倭復大衄始知賊未易圖有歸志至是川兵
破周浦賊俞大猷復有海洋之捷文華遠言水陸成
功請還然是時海洋回倭泊浦東川沙窪舊巢及嘉
定高橋皆倭據如故副使任坏率永順保靖土兵勦
新場倭寇時賊眾二千人皆伏不出而詐令人舉火
于數里外若將引去者上舍彭翹先入嘗之不見一
人於是頭目田雷田豐等爭入伏發皆死之賊豕突
去未幾復攻上海坏以輕兵三百及之擊敗于五里

喬習家墳又以兵援崑山而身閒行抵太倉毛家葛
隆諸屯賊方會集治攻具衝梯隊道內薄而登坏率
死士飛刃砍之連碎其首矢石交下相殺傷甚眾又
縋兵下突而前賊漸氣奪遂棄委走坏既居憂哀毀
又積苦兵閒疾作卒

三十五年春正月巡按御史周如斗參總督梅宜提督
曹邦輔輕率寡謀致川兵敗于東溝苗兵敗於新場
東兵敗于四橋乞罷黜時上深以南寇爲憂疑趙文
華言餘寇將滅爲不實屢問大學士嵩嵩曲爲營解

上意終不釋文華懼因言餘寇指日可滅督撫非人一敗塗地皆因吏部尙書李默恨臣前歲劾其同鄉張經思爲報服臣繼論曹邦輔則嗾給事爰棧孫濬媒孽臣及胡宗憲黨留邦輔浙直總督又不用宗憲而用王誥然則東南塗炭何時可解陛下宵旰何時可釋也默因得罪宜削籍爲民邦輔亦被逮罷王誥以宗憲爲兵部侍郎兼僉都御史夏四月倭薄溫州同知黃釗馳檄出迎擊被執倭欲還之索王合爲贖釗罵之不置倭磔殺之 江北倭流刦至固山山北

等港無爲州同知齊恩率舟師迎戰敗之斬首百餘級恩長子尙文次子首叔仲寔弟寶榮謙姪慎寅友良大卿孫童俱在行間嵩年十八驍勇善射獨前追賊至安港恩等從之伏發恩及其家丁錢鳳等二十一人力戰皆死之獨嵩慎寅三人得脫賊遂乘勝至金山殺鎮江千戶沈宗玉王世良于江中 倭率眾數千自乍浦入欲犯杭州遊擊將宗禮師兵九百禦之逆戰于阜角林分左右翼夾擊三戰三捷獲首功七十餘級賊首徐海等皆辟易稱爲神兵會橋陷軍

學海類編
三
潰禮與鎮撫侯槐何衡義官霍貫道力戰俱陷陣死
之禮驍勇敢戰所部箭手三千人皆壯士事聞贈卹
有差 總督胡宗憲奏遣生員蔣洲胡可願使倭砦
傳諭渠魁令無犯順從之已而可願等還言倭渠欲
通貢市宗憲以聞下兵部集議不可乃止 倭圍巡
撫阮鶚於桐鄉初鶚督學浙江開武林門納難民全
活數萬人超擢巡撫方倭之寇嘉興也鶚議主剿而
胡宗憲議主撫不相能倭自嘉興轉寇桐鄉氛益銳
去來實徐海麻葉領之陳東附爲東薩摩王弟書記

也宗憲謀閒之遣辯士說海海心動私語桐鄉守兵
曰吾已款督府矣城東門陳黨善備之是夕海道崇
德而西東方急攻桐鄉宗憲說海縛麻葉因僞爲麻
葉書致東令圖海故達海所東海中自疑始解圍去
一五月御史邵惟忠上言倭薄通州圍未解餘眾自
狼山轉掠瀕江諸郡縣而瓜儀爲畱都門戶鎮常爲
乃漕運咽喉不可視爲緩圖宜大集兵救諸臣戮力
靖亂下兵部議請調河南睢陳及山東八衛陝西延
綏兵及徐沛募兵救遣才望大臣一人總督以爲特

角保障留都帝然之已命兵部侍郎沈良才矣嚴嵩
揣知上覺趙文華欺罔且見譴乃令文華自以其意
請復視師嵩爲言良才不勝任江南人引領俟文華
至上乃止良才命文華以工部尙書兼右副都御史
總督浙福直隸軍務文華既至浙假監督權凌脅百
官搜括庫藏百萬計兩浙江淮閩廣所在徵兵集餉
留漕粟除金帑給醮課迫富民脫凶惡浪授官職于
是外寇未甯而內憂益甚 六月倭入慈谿縣知縣
柳東伯亡初王忬在浙計城各邑未城者慈谿士人

獨持不可至是倭眾大至知縣不知所禦攜印組亡
去殘殺民人無筭而縉紳尤甚始悔失計東伯失守
當坐死以無城可憑削籍爲民省祭官杜槐與其父
文明率兵追敗倭于王家團海道劉起宗委防餘姚
慈谿定海未幾與賊遇于白沙一日三戰殺賊三十
餘人斬一其帥槐被創墜馬死文明別將兵擊倭于
演武場斬白眉倭帥一從七生擒二倭驚遁呼爲杜
將軍已而追至奉化楓樹嶺以兵少無繼陷陣死
倭薄海鹽指揮徐行健程祿百戶方存仁逆戰死之

八月海寇徐海伏誅初胡宗憲以簪珥遺徐海侍女
翠翹綠珠令日夜說海縛陳東以報朝廷海且感而
隨文華方治兵擊海宗憲佯曰彼且縛陳東何戰爲
海果賂薩摩王弟縛東以獻於是海勢日孤海自念
數有功又信羅龍文誘約八月入謁督府于平湖海
先期以數百人胄而入宗憲文華鶚坐堂上海等叩
罪復謝宗憲宗憲下堂摩其頂曰朝廷且赦若慎勿
再虞厚犒遣之海旣出知官兵大集自疑宗憲使使
諭之曰官兵防東黨爾毋恐海請居東沈莊陳東居

西沈莊又令東詐爲書遺其黨曰海約官兵夾勦汝
矣東黨果疑相攻海令裨將辛五郎歸島宗憲密遣
盧鏜計擒之文華調兵六千旣集移營薄沈莊督之
急宗憲猶是憐海不欲遽戰文華迫之宗憲乃下令
與總兵俞大猷整師前進海知事變掘深塹自守柵
數重官兵望之不敢入阮鶚檄趨之大猷乃從海鹽
進攻東沈莊破之又追擊于梁莊會大風縱火諸軍
鼓譟乘之賊大潰斬獲一千六百餘級海倉皇溺水
死引出斬其首浙直海寇平海故杭之虎跑寺僧雄

學海類編
海上稱天差平海大將軍至是捷書上文華皆襲爲
已有帝命械擊首惡至京正法時浙東仙居浙西相
鄉二寇略平其分掠海門者把總張成敗之江北寇
流入常鎮者總兵徐珏敗之蘇松甯紹相繼告捷兵
部奏文華功帝從之降敕令文華還京論平倭功加
文華太保宗憲右都御史各任一子錦衣千戶餘陞
賞有差倭俘麻葉陳東等械繫至京禮兵部請獻俘
從之羣臣俱賀時倭略平惟舟山賊據險結巢未下
官兵坏守之不能克諸狼土兵俱已遣歸而川貴兵

六十人始至胡宗憲方畱防春汛隸俞大猷經營舟
山之賊會夜大雪大猷乃督兵四面攻之賊悉銳出
敵官軍競進賊敗歸乃以機箠捲火擲之賊四散潰
出斬首一百四十餘級餘悉焚死

三十六年冬十一月海寇汪直伏誅徐海等旣死汪直
復糾眾三千餘人甯波岑港大掠四境汪直徽人也
宗憲亦徽人乃以金帛厚賂誘之云若降吾以若爲
都督置海上通互市乃迎直母與其子入杭厚撫之
而奏遣生員蔣洲往諭與之盟直信之遂自奮言能

學海類編
肅清海波贖死命與其黨毛海峰葉碧川等從蔣洲
來杭州洲至而直未至人疑其詐巡按周斯盛請罷
貢罪洲于是逮洲獄洲乃陳諭倭始末及言直以誠
來其未至必風阻耳已而直果乘巨舟遣頭目數十
人隨來泊舟定海蓋初舟實爲颶風所損也宗憲使
人招直直願見洲洲方對理疑其缺望不遣遣遣戶
夏正質其舟直素與正善不疑遂詣軍門請罪具言
自效狀宗憲待以賓禮使指揮爲其館主給輿夫出
入復出蔬米酒肉供餽其舟人日費數百金且交質

爲信因其狀聞請赦之科臣王國禎力持不可疏入
謂直元兇不可赦宗憲乃密檄按察司收直等斬之
論平倭功加宗憲太子太保餘皆遷賞然直雖就誅
而三千人皆直死士無所歸益恚恨復大亂

三十七年春二月倭犯潮州之鮑浦攻蓬州千戶所僉
事萬仲分部水陸兵馬東西哨攻之臨敵而哨兵皆
潰領哨千戶魏岳高洪俱死尋犯福州巡撫阮鶚不
能禦取庫銀數萬兩賂之以新造大舟六艘俾載而
去夏四月倭掠台州臨海之三石鎮約數千人總督

胡宗憲擊走之倭攻福清破之執知縣葉宗文舉人陳見率家童禦賊不克與訓導鄔中涵俱罵賊死五月自海口出港參將尹鳳引舟師擊之沈其舟七斬首六十餘級生擒七人餘眾遯去鳳追擊東洛外洋復敗之銃傷及溺水死者甚眾福興患少熄倭攻惠安知縣林咸乘城禦之攻五晝夜不克丁壯死者數百人倭亦失亡相當乃引去咸率兵擊倭鴨山乘勝追奔陷伏中死之倭分犯同安長樂漳泉諸處秋七月以浙江岑港海寇未平詔奪總兵俞大

猷參將戚繼光職期一月蕩平命胡宗憲督之初宗憲遣毛海峰誘降汪直直至下獄海峰遂與委日善妙等五百餘人燒船登岸列柵舟山阻岑港而守官軍四面圍之屢斬獲然海中數苦毒霧賊憑高死鬪先登者多陷沒新倭復大至冬十月岑港倭移巢柯梅胡宗憲屢督兵討之不能克兵備副使谷嶠捍禦海上屢破倭制府以捷聞進山東參政三十八年春三月倭寇自象山河金纜井諸處焚舟登岸海道副使譚綸與賊戰于馬岡敗之斬首七十級

學海類編 卷之三
總督胡宗憲上言舟山殘孽移住柯梅卽其焚巢
夜徙力已窮蹙勢易成擒而總兵俞大猷參將黎鵬
舉邀擊不力縱之南奔播害閩廣宜加重治上命逮
大猷鵬舉至京訊治時人言籍籍謂倭之開洋也宗
憲實陰遣之倭南行泊浯嶼焚掠居民由是福建人
大譟謂宗憲嫁禍御史李瑚數其三大罪瑚與大猷
俱福建人宗憲疑大猷漏言故委罪以自掩而大猷
不善滑刺素不爲嚴世蕃所喜故有是逮廷臣惜大
猷才共假貸得三千金餽世蕃不死罷職發大同立

功 夏四月倭北趨通州總兵鄧成禦之不利指張
容被殺倭進據白浦鎮兵備副使劉景韶以遊擊邱
陞擊白浦于丁堰如皋海門三戰三捷賊謀犯楊州
景韶復督陞等以火攻其老營擊敗之焚死二百人
賊逸入潘家莊盡銳攻之先後斬首二百餘級初賊
自南沙登岸犯通州至是勦絕 廟灣倭合眾
攻淮安參將曹克新禦之戰于姚家蕩自寅至甲大
敗之斬首四百七十級賊遁入姚莊縱火焚莊死者
二百七十人賊退入廟灣拒守劉景韶督兵擊倭於

印莊斬首四十級賊西走次日復戰于新州賊遁入民莊我兵以火攻之凡再戰斬首二百六十級賊悉焚死無一人脫者時江北流委悉殄惟廟灣據險固守不出五月江北兵攻倭于廟灣衝其巢斬首四千我兵死傷過當復退守之時賊營甚固巡撫李遂以我軍鼓戰而疲宜圍守之賊乏食且水陸斷其行道可收全勝通政唐順之以爲玩寇乃自擐甲持矛麾兵以進屢挑戰賊終不出遂督兵入險賊盡銳東西衝殺傷相當自是復稍稍出掠覓舟爲走計矣順之

知失計乃駕言經略三川沙倭南去逾月倭困廟灣既久劉景韶督卒填壕塹逼壘而陣令水兵載葦焚其舟復水陸進擊倭潛遁入舟官兵進據其巢追奔至瑕子港斬獲頗多餘倭無幾不復能戰乘風開洋而去福建新倭大至多齎攻具先攻福甯連江羅源流劫各鄉進攻福州不克移攻福安破之參將黎鵬舉以舟師擊倭於海中七星山屏風嶼斬首六十級生擒六十八人時沿海長樂福清等境皆有倭舟廣東流倭往來詔安漳浦開浙江舟山倭移舟南

學海類編
來者尙屯浯嶼福州漳泉無地非倭矣舟山倭屯浯
嶼經年全是乃開洋去其毛海峰者復移眾南粵建
屋而居永福倭移舟出梅花洋參將尹鳳擊敗之巡
按樊獻科請趨胡宗憲應援未及行巡撫阮鶚往勦
之倭稍創 六月倭眾別部二十餘艘屯崇明三川
沙總督胡宗憲檄總兵盧鏜帥師攻破之前後斬首
百餘遁去宗憲以捷兼言唐順之贊畫功擢僉都御
史秋七月三川沙倭突犯江北由海門縣七星港登
岸流劫過金沙西亭將犯揚州參將邱陞禦之戰于

中家莊賊敗走仲家園復追至鍋團陞輕騎先進賊
覘無後繼盡銳來衝陞馬蹶被殺已而官軍大至賊
遁八月倭自鄧家莊敗後沿沒覓舟不得官軍尾之
于畱家橋白駒沙諸處倭餒甚奔莊我兵圍之時劉
顯兵至先登各營繼進縱火衝擊破其巢斬首二百
餘賊奔白駒沙追擊又敗之于七竈莊花墩共斬首
四百餘賊盡殄焉顯驍勇敢戰江北軍悉屬顯節制
故有功

三十九年春二月倭寇六千餘人流劫潮州等處時浙

直倭患稍息而閩廣警報至日 五月加胡宗憲兵部尚書兼右副都御史

四十一年春三月泉州指揮歐陽深率兵擊倭破之生擒江一峰泉寇稍甯 倭陷福建永甯衛大掠數日而去復攻永甯城破之大殺城中軍民焚燬幾盡冬十一月逮總督兵部尚書胡宗憲削籍從給事中陸鳳儀之言也獄具罷浙閩總督大臣設右僉都御史巡撫其地

四十二年五月復逮胡宗憲詣京宗憲自殺是時大計

京官復有言宗憲未盡法者有旨逮治宗憲至京自殺宗憲在浙中與趙文華同事文華退懷不敢前宗憲輒自臨陣戎服立矢石閒督戰方倭圍杭時宗憲親登城臨視俯身堞外三司皆股慄懼爲流矢所加宗憲恬然視之殲徐海汪直皆有功然稍稍事文華又握權太重勲臣總兵者由掖門通謁庭拜巡撫悉聽節制如三邊例宗憲才得而禍機亦萌此矣上好元修宗憲進白鹿稱賀大學士嵩北之會嵩敗被逮時歸安茅坤上書頌其冤 冬十月倭犯福建其自

浙之溫州來者合福建連江賊登岸攻陷壽甯政和甯德等縣自廣之南島來者合福清長樂賊攻陷元鍾所蔓延及于龍巖松溪大田古田之境無非賊者初浙江參將戚繼光既連破賊于林墩等處閩之宿寇盡平繼光引兵還浙遇倭自福清東營島登岸麾兵擊之斬首百八十級遂行而倭至者日眾始犯邵武殺指揮齊天祥轉掠羅源連江殺遊擊倪祿遂攻元鍾所城及甯德縣入之乘勝直抵興化府城不克乃合兵薄城下圍之且匝月巡撫游震得以狀聞請

調義烏兵以繼光統之起丁憂參政譚綸與都督劉總兵俞大猷協力共濟上從之十一月劉顯率兵接興化顯大兵由江西勦廣寇所提入閩率不及七百人且疲屢戰倭新至氣甚銳顯知不敵乃去府城三十里隔一江按兵不至欲掩逗畱之罪遣五率齋文詣府約欲率兵赴城禦敵賊獲五率殺之用其職銜僞爲顯文克期入城約城中勿舉火作聲恐賊驚覺詐以五人爲劉率齋入至期賊陽稱顯兵入城人莫之疑賊既大入猝起格殺城中驚亂參政翁時器參

將畢高倉皇絕城走同知吳時亮被殺賊遂據城中
三閱月殺掠焚燬顯卒乘亂攫之參政王鳳靈妻竟
爲顯掠去賊旣飽欲始如平海衛欲掠舟泛海去十
二月倭結巢崎頭城與都指揮歐陽深相拒久之不
出深望見兵少輕之直前挑戰伏發深與其下數百
人皆戰死賊乘勝陷平海衛事聞罷巡撫游得震逮
參政翁時器參將畢高劉顯坐觀望不救立功自贖
倭引兵出海把總許潮光以輕舟抄之賊還屯平海
衛副總兵戚繼光督浙兵至福建與劉顯俞大猷合

擊倭于平海衛大破殲之斬首二千二百級墮崖溺
死者無筭福州以南諸寇悉平

四十三年春二月舊倭萬餘攻仙遊圍之三月戚繼光
引兵馳赴之大戰城下賊敗趨同安繼光麾兵追至
王倉坪斬首數百餘眾奔漳浦繼光督各哨兵入賊
巢擒斬略盡閩寇悉平其得出者逸出境至廣東潮
州俞大猷又截殺之幾無遺類初倭旣自浙創歸嘗
一犯淮揚吳越皆不利遂巢閩中首尾七八載所破
城十餘掠子女財物數百萬官吏民戰及俘死者

不下十餘萬雖時有勝負而轉漕軍食天下騷動至是倭患始息

島夷卉服首見禹貢秦漢以來罕被倭患蓋以其俗愛鮮華地多饒沃五州七道三島五百七十三郡率皆樂土坏以大海君臣自保不愛慕中國也若乃海王充物居民仰食雲帆所指有無懋遷則又彼此咸賴高帝時士誠友定遺孽竄伏北邊南粵歲被創殘已而通謀逆臣伏兵市舶帝乃閉關謝貢示弗復通然而創設市舶互市不絕計深遠也後世識慮迂拘放失舊典初開橫海旋棄珠崖民競刀錐吏鮮保障秦關夜析楚吏晨疆勇士蹈險貪夫忘生於是內地

奸民勾引潛深海邦貴倖藏匿不可勝計矣貧民勢
家黷貨負直窮彝困頓進退咨且逃生水國求食波
臣邊吏戒心搜捕始急於是沿海不逞之徒陳涉力
耕怨家日眾黃巢下第憤恚思兵稍稍收聚倭裔窺
竊上國矣朱紘下車不畏疆禦窮治黨與少所報聞
夫廣漢索酷先求魏相李膺破柱不避黃門政求亂
本雖得河源福發朝堂意悲虎尾紘死而朝貴與海
逋交相賀也代臣畏禍海禁復弛浙東再亂王忬出
督援大猷于偏裨出盧鏜于獄中普陀一戰幾殲渠

帥游魂四潰旋掠江南而忬隨處邀擊頗多斬獲括
乃代頗騎還易毅大功不終自古悲歎此閩外有遙
制之憂中樞失內贊之力也嗣是天寵握兵乃棘門
之兒戲文華祀海實天雄之誦經倭患愈劇張經再
出經以功在銅柱因而偃蹇凌轢度亦自大匹夫耳
然視視事一月指揮羣帥王江涇之捷賊兵宵遁太
史稱其兵驕將悍或亦讒人之蜚語獄吏之深文也
文華行譖檻車入國蓋左豐求賂盧植徵還張讓交
通王允下獄自古未有小人同事而得劓制成功者

胡宗憲曲意主撫因勦成功賄斬徐海誘擒汪直安
武誘叔李廣誅降長致恨于封侯空銜悲于賜劍憲
雖引刃應無顏見二賊于地下也憲才望頗隆氣節
小貶側身嚴越卯翼成功耿秉因竇憲勒勲杜預事
朝貴甚謹封疆之吏固應折節乃尔耶倭寇披猖禍
三省任坏効命畱都俞大猷兩浙戚繼光驅馳閩海
類皆大國干城足以滅此朝食而乃大戮亟行更張
不一事權牽制流毒生民九閩無金城之任分宜少
裴度之忠羣賢隕喪國事凌彝固其宜也中丞張濂

家居省會身在圍城訟言時事涕淚交頤觀其疏中
所稱殘難民之首以償縱寇之功而督撫可知移罰
罪之典爲賞功之命而筦樞可知軍法不重人無死
志客兵掉臂士無鬪心而卒伍可知嗚呼鄭監陳圖
莫救當時之新法然而睢陽劍在已成今日之爰書
矣

江防總論

江防總論

清 翰林院編修姜宸英撰

岷江會眾川之流出峽而後滔滔東下然其勢猶未極盛也至過江陵則漢江統西北之水而趨鄂渚洞庭合西南之水而出岳陽又經黃蘄而向潯陽則彭蠡會饒徽贛袁諸方數千里之水以南出湖口東北納淮南之眾流泄宣潤之陂澤所受天下水幾十之四五自九江以下兩岸南北涯涘無際汊港縱橫故小則漁徒鹽戶出沒藏奸大則巨盜之揚帆鼓棹挾風濤而負固者不

可誰何也明制用都御史設操江署于應天府之新江
口十起九江府之南湖汎下至南直圖山三江會口一
千五百餘里以時分班操練水師又設南北兩巡撫兼
理兵務操臣任江中撫臣督岸上互爲策應而兩御史
巡閱之于是取民間之少壯充弓兵巡司保任聯結制
姦人無所得出入洲渚港浦步步設備營柵相望櫛比
而鱗密矣

本朝定鼎初設操江駐池州改駐安慶康熙元年始設
撤巡江兩御史裁操江而以其職并轄之于總督都御

史規制稍變焉臣謹按古之有事于江者未有不因江
之利者也易曰干公設險以守其國夫長江固天下之
至險也而亦有國者之所恃以爲守也徒知其害而不
知其利因用之以取勝豈謂善識時勢者哉然而有南
北之分勢有勦業之大勢有一統之全勢所謂南北之
分勢若孫吳東晉五代及後唐南宋是也時則以金陵
爲居重以上流爲控扼以全蜀爲根抵蓋由京口而至
秣陵是爲長江之險自武昌而至江陵是爲荊湖之險
守長江者以兩淮守荊湖者以襄漢南宋李綱論守備

學海類編
之宜請于淮東西及荆襄置三大帥屯重兵以臨之分
遣偏裨進守支郡上連下接自爲防守其說偉矣南唐
罷湘淮把淺之戍周師得以深入楊行密與朱溫亟戰
于淮上溫不敢渡江而楊氏遂能以淮安一隅與中原
抗此則淮江相爲唇齒之效也晉羊祜據襄陽險要開
建五城給吳人罷守石城杜預以收江南之捷晉陶侃
取襄陽命桓宣守之而趙人不敢越漢沔以取荆此則
襄陽與荆湖相與唇齒之效也然而根抵尤在于蜀者
江之所從出也我不得蜀則長江之險與敵共之矣晉

之滅吳隋之平陳元之蹙宋皆先取蜀而後舉兵隨之
其已事也獨典午南渡未嘗得蜀而得晏安江表數十
年無西顧之憂者以蜀之未與中原通也符堅旣克漢
中復平蜀密令人預備舟師于蜀將以入寇于是蜀漢
爲軍順流而下幽冀之眾至于彭城使其不輕身先進
徐以待東西萬里之師水陸俱下以壓區區之江左豈
有幸哉故蜀固而後襄漢得爲荆湖之藩蔽荆湖守而
後兩淮得爲金陵之門戶此偏安之勢然也宋之取江
南也所出之道一荆南此沿江而下之師也晉之取吳也

所出之道六涂中江西武昌夏口江陵益州而沿江之道五隋之取陳

也所出之道八六合襄陽永安江陵而沿江之道四元

之取宋也所出之道二淮南襄陽而沿江之道一則上流之

勝勢斷可識矣獨明太祖起兵淮甸日決勝于吳楚之

閒其始由和州渡采石取集慶尋取京口以斷張士誠

絕江之路既而陳友諒襲太平犯龍江不與之爭于境

內乃溯流直上而西殪之于鄱陽進兵武昌而東南大

定矣此所謂因江之利而善用之以取勝者開枴之盛

業帝王之極功也至于承平已久風波恬息持籌長筭

之士無所得騁其閒其視長江衣帶固漁人舟子之所
以泳游而玩狎之者也然而備又不可以不預也昔吳
紀涉之對魏主曰江自西陵以至江都七千五百里疆
界雖遠而險要必爭之地不過數處猶人身七尺之軀
靡不受患其護風寒者亦數處耳彼所為數處者不過
西陵荊州九江采石京口迫江諸險要而已此特就其
國言之也若夫有天下者則其風寒之所當護者又有
大于此者焉試以明事徵之正德閒劉齊之寇沂流上
至九江又下南京往來者三如入無人之境然其始亂

則近畿也其末也賊張獻忠由黃州團風鎮飛渡武昌陷省會全楚魚爛同時羣盜豕突池和廬鳳悉經焚掠烽火照于江南然皆秦豫來也如是病有所從起患有所必備雖七千五百里之外孰非吾一體之所當護者乎而况卽此七千五百里中水陸之路斜汊支港傍溪曲徑觸處成險雖節節分營而于各營之中又自有其護風寒者其規模既廣其布置宜密故善爲防者必合天下之全勢而計之務使遠邇聲息真若一體之相周流聯屬而不致有一旦猝然不可救之患而已此在一

隅偏安者苦于掣肘而若有所不及爲今舉天下之大唯吾所欲爲之而不致有猝然不可拔之患者非萬世一時哉故曰有一統之全勢者此也我

朝撥亂之餘功令一新所遣將軍都統以下星列棊布于荊州江甯京口諸重鎮奇兵遊江諸營或守禦非常或往來探哨千里之遙應若呼吸隔江南北若運指臂以故比年以來滇黔兩廣外暨九真日南珠璣孔翠異香文犀鬪筵寶幪之貢浮江而入河者若過于枕席之上巴蜀之名材荆楚之秔稻連檣接艫輸于天府

散給吳越者若取諸左腋之下可不謂盛烈哉然而芟
薙萌芽堦塞罅漏圖大于其細制近于其遠吾之法一
定而天下之變日出而不窮其不得以太平無事而忽
之也明矣臣謹按明制江防與唐宋經略微有不同者
嘉靖以後懲于倭患江防與海防相爲表裏者也江自
京口金焦起下與海接爲第一重門戶外汜于廖角嘴
營前沙南北相對則爲入江第二重門戶也江南以及
通泰之呂四場掘港諸處與海相通者在在皆所經畫
凡以防江卽以防海此其所以視前代加重而我

皇上於今海氛旣靖之後儻不能無加意于門戶之守
者明主之意周乎天下誠非前代帝王所能及也舊明
操江洪朝選故有江防要覽諸書後吳時來作江防考
王篆繼緝之

本朝順治閒操江臣李日芄具有成書皆略載當時現
行事例而已不及有所證明臣今紀自明世以及
本朝設官各汛要害參伍古今備志沿革而于大江源
委亦詳著于篇

本國諸商各民
 亦水籍著
 海防總論
 清
 翰林院編修姜宸英撰

海防總論

清翰林院編修姜宸英撰

國家混一區宇聲教覃被汔于無垠唯是東南縮波而
 州者千餘里一二狂孽弄兵島嶼烽烟時接吳越閒至
 不得安枕而寢

皇帝御宇之十八載神謀潛運削平反側從疆吏請以
 次用兵于臺灣樓船直指繫組待命厥角稽首恐後遂

略定其地

天子乃按輿圖置一府三縣設之官府綏職之易鱗介

皇清類編
卷之
為衣裳于是依島之國為我邊界海隅出日罔不率俾
皇哉振古無前之偉烈雖詩書所載何以加茲先是海
寇鄭成功盤踞金門廈門閒尋奪臺灣居之遊船入犯
飄忽南北軍吏苦于奔命康熙初廷議以為徙民內地
寇無所掠食勢將自困遂悉徙粵閩江浙山東鎮戍之
在界外者賊計果絀降者接踵二年立定界椿連歲遣
官巡閱邊海諸郡縣八年有

居漳泉

詔稍展縱民得採捕近海十三年成勛子經承閩叛洊

王師收閩寇遁疆臣再修邊備而海壇金廈復置戍兵
矣十九年六月福建督撫臣議處投誠之眾奏請給還
民界外田地以無主者俾之耕種且曰方今海外要地
已設提督總兵大臣鎮守是官兵在外而投誠在內計
可萬全無慮

詔許之閩界始稍稍開復二十三年五月克臺灣十月
兵部議請各省開界得

旨江南浙江福建廣東沿海田地可給民耕種諸要地
防守事宜其擇大臣往視焉乃以工部侍郎金世鑑都

御史呀思哈往江南浙江吏部侍郎杜臻內閣學士石
杵往福建廣東

上面諭遣之許以便宜設防守事竣奏聞世鑑等往會
督撫巡視遂盡復所棄地與民各就地險易撥置兵戍
疏上

報可自是沿海內徙衛所巡司墩臺烽堠寨堡關隘皆
改設于外略如明初之制民內有耕桑之樂外有魚鹽
之資商舶交于四省徧于占城暹羅真臘滿刺加淳泥
荷蘭呂宋日本蘇祿琉球諸國仍設權關四于廣東島

門福建漳州府浙江甯波府江南雲臺山置吏以莅之
使泉貨流通則奸萌自息此上策也而諸番緩耳雕脚
之倫貫領橫裙之眾莫不累譯款貢叩關蒲伏請命下
吏凡藏山隱谷方物環寶可效之珍畢致闕下輪積于
內府于是

恩貸之詔日下德澤汪濊耄倪歡悅喜見太平可謂極
一時之盛然而帆檣接于內地則盜賊生心互市通于
外國則狡蠻思逞此前代已事始未嘗不警戒而後稍
弛防患輒中之宜

皇上之惓惓南顧慮此至重也始明太祖吳元年用浙江行省平章李文忠言調兵戍海鹽海甯各州縣洪武二年命參政朱亮祖副平章廖永忠取廣東遂命亮祖鎮守建置衛所七年詔以靖海侯吳楨爲總兵都督僉事俞顯副之領江陰廣洋橫海水軍四衛舟師出海巡哨所統京衛及太倉杭州溫台明福建漳泉廣東潮州諸衛官軍悉聽節制事權專而責亦綦重矣十七年起信國公湯和于家使巡視浙江福建沿海城池和至浙則建議北起乍浦南迄浦門縈迴二十里設九衛置五

十九城及諸所巡司民丁四調一爲戍兵是年江夏侯周德興亦築福建海上十六城置巡司四十有五按籍練民兵十餘萬戍竝海衛二十七年勅都督僉事商嵩巡視兩浙城隍簡閱軍士又命魏國公徐輝祖安陸侯吳傑練兵海上時廣東都指揮同知花茂上言請徙廣屬逋逃蠻戶爲兵增設依山碣石等二十四衛所城池于要害山口海汊立堡撥軍戍守詔從之而命傑董其役故閩廣江浙一切海上阨隘城堡傑德興和所建設爲多蓋是時中國數被倭二年寇山東竝海郡縣又寇

學海類編 卷之四
淮安三年寇山東遂轉掠浙閩自後南北竝受其患太祖深憂之先後設衛所屯軍所轄于衛衛轄于都司而總屬之五府其卒伍之設每百戶所旗軍一百一十有二千戶所一千一百二十衛列五所及衛鎮撫軍凡五千五百有奇各衛屯田軍率十分其七守城三屯糧屯軍一人賦田二十畝而官征其什之一軍屯錯列分墩而守自粵抵遼延袤八千五百餘里烽火相望而竝海以南迫近倭故其戰府備尤密云廣東瀕海之府八其六府分爲三路東路惠潮接壤閩疆商舶通番所必經

也左挈惠潮右連高雷廉而爲中路者廣州倭寇衝突莫甚于東路而中路次之西路高雷廉又次之高雷廉西物貢道之所從入也守廣者以三路爲扼要福建設水寨五在漳州曰銅山泉州曰浯嶼興化曰南日山福州曰小埕福甯州烽火門皆控制于海中浙江立沈家門水寨兩浙衛所戰艦協哨南哨至玉環烏沙北哨全馬蹟洋山而歸重于舟山定海江南之邊海在蘇松松江有海塘而無海口其要在陸金山衛爲之衝蘇州之沿海多港口者各設水兵堵禦而崇明爲賊所必經也故

兩處皆設重兵鎮之至狼福山與圖山三江相呼應又
爲南北海防第一門戶江北之戰水陸並用登萊三營
連絡曰登州曰文登曰卽墨其外島嶼環抱迤邐以及
遼陽而金復海蓋旅順各衛星羅碁布足嚴守望此其
大凡也自成宏後迄嘉靖初倭警寢息者五十餘年邊
備廢弛衛所屯田并兼豪右軍戶亡耗不復勾補水寨
移于海港墩堡棄爲荆榛哨船毀壞不修而奸民逸囚
漁人蟹戶咸伺隙思釁勾引山城失職之貢使嘯聚稱
王騷然蠢動一旦鋒突四起武夫喪氣抱首鼠竄賊無

亡矢折刃衄衄蹂躪徧于江南城野蕭然白骨填路矣
然後謀臣猛將分道出鎮增兵設屯人人扼腕而談戰
守起壬子至癸亥首尾十餘年中國始得安息此浸失
祖制之故也善乎總制胡宗憲之言曰夫謂之海防者
則必宜防之于海猶江防者必防之于江國初每衛各
造大青及風尖八槳等船百餘隻更番出洋哨守海外
諸島皆有烽墩可泊後弛其令列船港次浙東于定海
浙西于乍浦蘇州于吳淞江及劉家河夫乍浦灘塗淺
閣無所避風吳淞江口及劉家河出海紆迴又非海防

要地故議欲分番乍浦之船以守海上洋山蘇松之船以守馬蹟定海之船以守大衢則三山鼎峙哨守相聯可扼來寇而又其外陳錢諸島久爲賊衝三路之要宜以總兵屯泊其地每于風汛時協軍巡哨使不得越島深入則內地可以安堵總兵俞大猷亦曰倭自彼島入寇遇正東風經茶山入江以犯直隸則江內正兵之船可以禦之遇東北風必由下八山陳錢清水馬蹟蒲嶼丁興長途衢山楊山普陀馬墓等嶼經過然後北犯金陵西南犯浙江請于浙江共設樓船蒼船數百隻分伏

諸島往來巡探攻捕名之曰遊兵而遠遏之于大洋之外議者多是之或謂海棲經月必有颶風挽崖複礁廉厲倅劍戟不可下碇癸丑俞大猷圍王直于馬蹟蛟龍驚砲起幾全覆沒師旋賊逸乙卯秋浙直會兵大衢殿前邀賊歸路暴風雨大作飄舟以萬計是邀擊海上之難也蓋倭從南來晝行夜止依山棲宿始至必泊陳錢次馬蹟次大衢次殿前洋山若驛傳然可逆數知也然海波無際賊覘知諸山有備東西南北何所不適嘗聞海中長年云遊颶風者舍山泊泛大洋多得全逆知死

地不避寇知豈出其下哉故必依此四山嚴會哨應援之令潛師伺敵發無不中此與設官屯駐顯示之標者利害相去懸甚右通政唐順之疏曰臣竊觀崇明諸沙舟山諸山各相連絡是造物者特設此險以迂賊入寇之路蔽吳淞江定海港口國家設縣置衛者以此而沈家門分哨之制至今可考今宜于春汛時用兵備數員暫駐崇明舟山而總兵以下分海面南北會哨晝夜揚帆環轉不絕其遠哨必至馬蹟而止副使譚綸甚善其說而謂陳錢馬蹟諸山在內海之外止可出哨不能設

守蓋海戰之弊有四萬里風濤不可端倪白日陰霾咫尺難辨一也官有常汛使賊預知趨避二也孤懸島中難于聲援三也將士利于無人掩功諱敗四也昔江夏侯五水寨舊址設在大洋後人以應援不便移其三于海岸致寇無門庭之限議者謂宜復如舊制或謂復之不便而信國經營浙海棄下八山不守謹置汛于沈家門人卒便之非江夏之先見不逮信國浙閩之勢異故也然賊自五島開洋諸山曠遠蕭條無居人得採捕小民嚮導以來近岸常無覺者自嘉靖乙卯後禦洋之法

立哨探嚴緊官得預備則藩籬之守其法終不可廢故必哨賊于遠洋而不常厥居擊賊于內洋而不使近岸斯策之最善而當時之議亦卒未有能易此者也初日本之犯中國山東甯海成山諸衛數被其毒及嘉靖之亂首犯福建以及浙直而延蔓于淮揚獨山東竟未嘗被兵何也蓋明起南方大兵所聚北地置戍猶少故寇時躡入然東南猶不免焉迨防守既密南北少事承平日久士卒生長南方風土脆弱兼之衛所軍部眾不多兵力散渙而瀛渤之間風氣堅悍如故寇來獲少所失

亡多所以日夕垂涎江南北或比壤一日而破數縣或千里同時而殘諸郡其時召客兵募土著徵調煩苦民力大竭必待督撫重臣前後彈壓而後定

本朝創業徹都指揮千百戶之兵而概統于將軍提督總鎮分領于城守協鎮以下大者宿兵累萬次亦數千各城保守要害清野以困跳浪之賊如是者三十餘年而卒制其命賊不能以流劫郡縣生民不致大困者兵力之出于一故也時勢不同代各異制考之于古三代以前尚矣秦命南海尉任囂築瀧口漢陽嘉中亦詔緣

海益屯屯兵盜賊至晉咸和閒趙將劉徵帥眾數千浮
海抄東南葛縣殺南沙都尉許儒南沙今常熟縣地尋
寇婁縣武進郗鑑擊卻之此自北而南寇道之始通而
海上自此漸以多故及晉末運恩循道覆相繼倡亂始
入會稽上虞終于廣州始興又寇道自浙入廣之始也
時謝炎以會稽守督五郡軍事率徐州文武戍海浦今
自龔山而東至闌風石堰鳴鶴松浦蟹浦定海皆其地
劉裕戍句章吳國內史袁崧築滬瀆壘後裕與盧循相
持潯陽潛遣水軍從海道襲其番禺則其戰守皆在吳

越之閒史記恩曾一走郁洲今臨朐縣東北有郁洲山
而未嘗逸出爲民害然則海防之亟于江南舊矣顧其
制不概見考宋時嘗于明州招寶山抵陳錢壁下置十
二水鋪以瞭望聲息然宋終始未嘗罹倭患也至有明
之世建置詳矣謹次明自洪武以來所設官立軍以防
海外海港海岸事宜各省會哨海界及日本朝貢入寇
互市始末然後備列今制別爲篇如左嗚呼強弱因乎
時也盛衰本乎治也明太祖不勤遠略來則撫之貳則
絕之選將練兵修備日如寇至故不庭之國再世來王

後人反是卒以召亂

今皇上端拱於穆清之上闡昧幽阻罔弗耀以光明以故天威所震陸讐水慄猶數諭邊吏慎固封守毋敢邀功生事疆場之臣亦朝夕討訓以稱

上德意今坐享太平視所經略若織悉過計一旦有事舉而措之成法具在始知創制者之用意深遠不可測量而以遺萬世子孫之久安長治者豈其微哉臣所撰次依海道所經自廣東西路始福建浙江江南登萊天津衛遼陽以次及之又括海南北所經各省郡縣自爲

一卷其沿海山沙寇船入犯分合日本輿地皆有圖

Blank columns for text on the right page.

江防集要

清江陰趙甯管亭輯

江防一曰夷陵昔公孫述下兵江關拔夷道而據荆門
王濬治樓船下益州破吳荆門夷道而江南遂平陸
伯言曰夷陵國之西門失之則荆州可憂是也一曰
襄陽羊叔子開府于此地以為滅吳根本梁武帝亦
于襄陽起兵以平石頭若元人并宋頓師于襄樊者
數年襄樊既下而江南自潰矣此又其一也一曰江
陵魏武破荆州下江陵以伐孫吳杜征南伐吳先克

江陵宇文氏南侵于謹渡漢而下江陵是也既至江陵則沿流而下武昌亦一道也一曰黃州金人自黃州逼江州劉光世置酒高會不設備金人渡江是也若夫密邇江甯所最扼要而設防宜先者一曰皖建安中孫仲謀攻皖克之使諸葛恪守其地對岸立營以爲金陵屏蔽今之安慶是也一曰無爲州其相對爲濡須口孫吳于此作塢以拒北軍金兀朮自馬家渡濟江陷太平是也一曰歷陽卽今和州相對爲采石蘇峻叛于歷陽濟自橫江登牛渚侯景自橫江濟

采石韓擒虎楊行密亦渡采石宋人平江南樊若水建議以浮橋濟采石金亮南侵亦臨采石明太祖亦自采石渡江以平集慶路是也一曰瓜埠元魏伐宋魏里自陵瓜埠掠民廬舍及伐葦爲筏聲言欲渡江者是也一曰廣陵魏文帝觀濤于廣陵嘆曰魏雖有武騎千羣安所用之及隋伐陳賀若弼自廣陵濟江是也其他若下蜀至京口通泰至平江又其下流也凡此數者皆濟江之要地也其順流而濟者則夷陵以下數處也其截流而濟者則黃皖以下數處也順

流而濟者舟師也其道遠而實易截流而渡者水陸兼進者也其道近而實難今沿江而上宜精練水師昔漢將岑彭以列艦逆蜀于荆門蜀兵保江州不敢出魏武南下周公瑾以舟師三萬進據夏口而魏武敗還如一旦上流有變必先據梁山蕪湖下三十里以待之此三者守江之長算也今宜遠扼荆門近控夏口又近則屯梁山先其不意以制之

自京口而至秣陵控制荆揚引輔江湖咫尺淮甸應接梁宋人皆知爲長江之險然而不知爲守淮計則非

知長江之險者也自武昌而至江陵東通吳會西連巴蜀南極湖襄北控關洛人皆知爲荆湖之險然而不知爲襄漢計則非知荆湖之險者也自涪陵而極成都土地險塞沃野千里控渝扼瀘聯接關隴人皆知爲巴蜀之險然而不知爲漢中備則非知巴蜀之險者也蓋長淮所以爲江浙之藩籬襄漢所以爲荆湖之脣齒漢中所以爲巴蜀之門戶晉人能守合肥壽陽以爲重地故劉石終不能逾淮以圖晉陶侃使元宣鎮襄陽故趙人不能越漢沔以取荆蜀以魏延

學海類編 卷之三
鎮漢中故魏人不能逾南鄭以謀蜀昔祖狄自淮陰
進兵以復河南劉彥之自漢入泗以平司亮則江淮
之形勢可用也元濫自汜漢以趨霸上柳元景自襄
陽以克潼關則荆襄之形勢可用也漢高祖自南鄭
以克三秦諸葛孔明自漢中以鎮關隴則漢中之形
勢可用也爲今計自淮泗以擣青徐守壽春以接汝
潁固荊州以開蜀道控襄陽以當川陝固洛陽以制
潼關西南守江西以運百粵東南守浙江以沼閩吳
開墾全楚因糧唐鄧則天下大勢復矣

夫江東極于海上流江陵歸峽則襄陽隨郢爲之藩蔽
中流武昌九江則舒蘄光黃爲之藩蔽下流建康京
口則真陽楚泗廬壽爲之藩蔽今自淮以東以楚泗
廣陵爲之表則京口秣陵得以遮蔽自淮以西以壽
廬歷陽爲之表則建康姑熟得以襟帶江西之鎮莫
重于潯陽而舒蘄者潯陽之表也湖北之鎮莫重于
武昌而齊安者實武昌之表也

淮陰盱眙爲淮右臂鍾離蘄春爲淮左臂

大江之南上有荆鄂下至常潤十郡之間要緊者七渡

大上流最急者三荆南之公安石首岳之北津中流最
緊者二武昌太平之采石下流最緊者二建康之宣

化鎮江之瓜州

襄陽不沿海鄖陽不沿江實為全楚江防首地岳州府

江防九溪衛

九淵關三江口關

慈利縣天平所

魚洋

避隘細沙隘遙望隘鴉兒隘中靖

麻寮所

靖安隘山

磨門隘石磊隘長梯隘龍溪隘

華容縣

古梅

石門縣

慈利縣

安福寨索口寨西牛寨武口寨豐川寨

江南沿江信地 安慶守備池州南岸上自馬當起下

至池口止二百九十里安慶北岸上自史家溝起下

至老洲頭止三百六十里荻港把總池州太平南岸

上自池口起下至東梁山止計三百五十里安慶廬

州北岸上自老洲頭起至西梁山止計三百里遊兵

把總太平江甯鎮江南岸自東梁山起下至高資止

計三百四十里和州江甯北岸上自西梁山起下至

黃天蕩止計二百四十里 儀真守備江甯揚州北

岸上自黃天蕩起下至瓜州止計百四十里瓜州衛

總三江口把總揚州北岸上自瓜州起下至廟灣止

計二百四十里圖山把總鎮江常州蘇州南岸上自
高資港起下至包港止計二百五十里 上元縣上
抵高橋門二十里下至句容縣土橋鋪三十里 江
甯縣上至圭山四十里下至黃溝口二十里 和尙
港大勝關上至當塗縣界葛岡鋪三十里下至金家
墳十里 江甯去句容九十里句容抵龍潭抵斜溝
俱七十里長江一帶洲渚限隔惟斜溝龍潭二處船
隻由此出入故黃天蕩爲賊淵藪而龍潭斜溝則津
要地也 溧陽雖濱大江然去金壇宜興俱不百里

金壇去鎮江不遠宜興去蘇松不遠江賊海寇俱宜
預防 高淳縣不近江洋止有廣通鎮東垣河道由
溧陽宜興常州無錫通接松經行往來客商船隻
六合縣居江北東南通江 江淮巡檢司去浮沙口
及瓜埠俱百里其閒穴子河王家套八字溝甚是險
要 秣陵鎮陸要路 繁昌縣巡捕劄宗三廟係
荻港三山二司接界最爲要害 和州芝麻河口
揚州府青山爲黃天蕩最要 舊江口爲儀真縣喉
舌重地 蔣八港僅逼鎮城通接孟河海口等處爲

東南險要之最 三江會口上至瓜州鎮下至廟灣止共計江面百五十里乃瓜儀險要之最 鎮江衛督軍防守金山江操軍在金山西馬頭陸路把截圖山兀處江邊與周家橋對乃鎮江咽喉留都之門戶 鎮江府東西二馬頭皆濱大江逼近城郭乃要地也守焦山護東津守金山護西津哨北至瓜洲儀真以備江寇南至圖山安港以防海賊

江都縣三江會口與江南圖山相對乃江防第一重門戶中有順江洲江面頗窄水流湍急最爲險要此處

能守瓜儀可保留都無慮或賊從江南而入則圖山爲正兵三江會口爲奇兵賊從江北而入則三江會口爲正兵圖山爲奇兵又一字港上接圖山十里下接三江會口十里泊守中流以便兩地協助防守

江都縣東南八十里沙河港與江心焦山寺相對瓜洲鎮南濱大江北到府城四十五里與江心金山寺相對是第二重門戶建有甄城江南糧運由此過埧

儀真縣何家港若賊由鎮江沖來必趨本港則西入儀真東奔瓜洲北侵楊子橋等處舊江口與江心新洲

相對儀真縣南下江口與江心天甯洲相對是第三重門戶其洲接連何家港為江洋要害儀真城東到瓜洲鎮四十里西到江甯六合縣六十里東北到揚州七十里南濱大江五坦貨財湊集漕運糧船由此過關第一要害

東溝係六合儀真二縣交界處正當黃天蕩大江之中險要尤甚

楊舍迤西江陰縣北枕長江而黃田港切近縣尤為要害靖江孤懸江心要害賊由大江南突孟河尤為險

要

儀真縣東北十五里都天廟即新城通衢

圖山陸路內通埤城外通戴港東至孟河南達丹陽西接府城及東南馬頭俱係要害或賊從孟河至埤城則埤城為正兵戴港為應兵賊由戴港登岸則戴港為正兵埤城為應兵東津當為伏兵府城坐枕江干更宜把截西津馬頭并防禦四門兩關

永生洲添設防汛因瓜儀常等處襟江帶海要地空闊聲勢不能相援

金陵枕江江防最急太平采石東南襟喉議扼險者必斷采石明太祖自和陽濟師克之故下諸郡如破竹江西江防信地南湖嘴守備南岸上自江西九江府德化縣城子鎮起下至馬當止計二百九十五里北岸上自湖廣龍坪起下至沙灣角止計二百四十里上哨至德化縣城子鎮止下與安慶守備官兵會哨

海防集要

清 古廊韓 奕克振輯

自江防海廖角嘴營前沙南北相對海岸約闊一百四五十里爲第一重門戶狼山福山相對海面闊一百二十里爲第二重門戶周家橋與山相對周家橋北岸至順江洲與江南分界江面約闊六七里順江洲至新洲夾江面約闊七八里新洲夾至山南岸江面約闊十四五里爲第三重門戶倘至不已守金焦南岸斯爲下策

海潮應月浙江廣福等處潮俱有信獨瓊州潮半月東
流半月西流其小大應長短不隨月
松江與太倉通泰州有沙船淮安有海雕嘗由海至山
東蓬萊貿易云離天津不遠

蓋江南東海之防守在崇明吳淞江口而要在蘇州故
崇明吳淞江設所而蘇州重鎮設三衛江北淮南海
防守在泰州通州興化鹽城而要在揚州高郵淮安
故泰州通州興化鹽城各設所而惟揚州高郵淮安
設衛淮安當大瀆通海尤其要處故爲重鎮設二衛

淮北海防患在東海守在海州而要在邳州故東海
二州設所而邳州設衛

倭寇過洋如遇南風多則犯浙直遇北風多則犯閩廣
中流風水不便則收馬蹟羊山候便開船如遇南風
必由高家嘴而入犯七八九團以至竹箔沙寶山吳
淞入內彼處設鎮守且劉河與吳淞海面不遠兵船
瞬息可至見分五哨一哨泊守新竈一哨泊守黃窰
一哨出洋遠探二哨坐泊港內若由蛇山外洋而來
必經三片高家沙入內三片沙係江北要路狼山襟

喉又登舟沙實係福山白茅常鎮門戶議彼處兵船一枝住泊與崇明兵船應援福山兵船一枝泊守營前沙與江北舊守山前沙兵船犄角白茅兵船泊守登舟沙爲營前應援以固入犯要路楊舍逼近狼福乃由海入江門戶兵船一枝泊守褚家沙哨至營前三沙洪一枝泊守三丈浦一枝泊守谷瀆港但自褚家沙至楊舍以及江陰孟河一帶江面窄狹險沙頗多船難行若不遠出外洋哨探邀擊一遇入江縱使堵截勢難萬全未免登岸入內之虞

海船入江必由崇明南北二路縣後掘担二沙在縣之北易于膠淺凡舟之輕小者由此而行竹箔宋信嘴在縣之南其水深窪凡舟之重大者由此而行二路堵截更無入江之路矣崇明者天生此沙以鎖江之水口江防第一關鍵實在是也過此以西方論營前靖江金焦此設險之大旨也京口雖係江南諸郡咽喉然從古江寇犯金陵未有由此而進者以沿江南岸疊嶂如屏而潤州秣陵之間夾岡險陂無港可達故也若從通泰登陸循江北內地而行屯兵六合分

師渡蕪湖采石太平而北豈非地勢之至要者歟故
嚴江防須重江北

海防之要惟有三策出海會哨無使入港者得上策循
塘拒守無使登岸者得中策出水列陣無使近城者
得下策不得已而至守城則無策矣吳淞乃水陸之
要冲蘇松之喉吭也提兵南向可以援金山之急揚
帆北哨可以扼長江之險自吳淞而北為劉家河為
七丫港又東為崇明縣七丫而西為白茆港為福山
又折而西北為楊舍為江陰為靖江又西為孟河為

圖山此皆舟師可居利于水戰但吳淞而南雖有港
汊每多沙磧賊可登岸兵難泊舟非選練步兵循塘
拒守不可也今日吳淞所而南為川沙堡又南為南
匯所其西為青村所又西為柘林堡此皆不遠六十
里聲援易及又西為金山衛近添設遊兵往來遊徼
則北可以護松江而西可以援乍浦

廟灣勦賊之路原有兩條一條從寶應拖船過埧水路
自清溝喻口進攻則兵勢既迅而饋餉亦易一路從
淮安全馬邏陸路進攻此兵勢既迂而饋餉亦難及

江北與江南浙福不同靠不得水戰止靠陸戰也

海道之要害切于江北者狼山當江南之吭而廖角掘港皆揚之東南界也胸山據淮海之首楚州嚶遊山皆淮之東北境也中包泰興之周家橋鹽城之射陽湖山陽之雲梯關廟灣等處此皆沿海冲要之區寇盜停舶出沒之處乃據守所當先者也

淮揚二郡界于江淮之間東濱大海賊舟出沒三而隄防爲難今考其地形起自東南廖角嘴以抵姚家蕩縣延三四百里除安豐等三十六場俱在腹內不爲

要害要害之處乃通州也狼山也楊樹港裏河鎮也餘束餘西場也廖角嘴呂四場也掘港新閘港也廟灣劉莊金沙場也其尤要者有三曰新場出入至逼近揚州也曰北海所從以通新閘港且有鹽艘聚泊也曰廟灣其爲巨鎮而通大海口也

海舟必得山澳而後可泊無澳之山不可以避颶風如之何敢泊也

洋山乃蘇松禦倭海道之上游明議浙直哨船期會于此以其居浙直之交

崇明守則三江盡安瀾海門扼則通泰無烽警

江南控扼在崇明浙東控扼在舟山天生此二塊土大海中以障蔽浙直門戶諸哨船皆自此而分而南北總會于洋山若會哨嚴緊遇船卽打賊從何入

浙海諸山其界有三黃牛山馬墓長塗冊子金塘大樹蘭秀劍山雙峙雙塘六橫韭山檀頭等山界之上也灘上澚山羊山馬蹟兩頭洞魚山三姑霍山徐公黃澤大小衢大佛頭等山界之中也花腦求芝絡華彈丸東庫陳錢壁下等山界之下也此倭寇必由之道

也海防莫急于舟師四參六總分哨守各洋港其南哨也至鎮下門南鹿玉環烏沙門等山交于閩海而止其北哨也至洋山馬蹟灘澚衢山等處交于直海而止陳錢爲浙直分艘之處交相會哨是故今日之設險自內達外有三重焉會哨于陳錢分哨于馬蹟洋山普陀大衢爲第一重出陀家門馬墓之師爲第二重總兵督發兵船第三重備至密也

吳淞江口及劉家河出海迂回非泊船處所議分番乍浦之船以守海上洋山蘇松之船以守馬蹟定海之

船以守大衢又其外陳錢諸島尤爲賊冲三路之要
宜統戰船駐劄查自甯至定江路約可六十里相應
每日一閒俾將帥統率兵丁乘潮而下放于海口明
旦復乘潮而上達于江橋往返必挽弓飛刀一如陸
操之法如洗砲時卽于船上拖放以服習其勢此之
謂日操又自甯至定至奉化邊海老涯長數百里與象
山相對中間一水至台之甯海而盡名雖海尾實係
內港視自甯至定之江其闊可數十倍今旣于江中
日操更於每月中擇風日平和之時放舟出關試演

于河頭渡

在甯波

一帶或三五日而後還則自習空闊

何畏望洋此謂月操

浙江防海設六總金盤總守海港者寨凡五守海岸者
寨三十有二守海外者自大巖頭山海島玉環山霓
澳南龍山南鹿鳳凰山凡五獨南鹿鳳凰山澳闊大
坐臨深海山外大洋別無山島自明初以來俱假此
棲泊實巢穴也松海總其守海港者七守陸路者八
八者之閒惟健跳城三面阻山皆峻嶺東面山前距
海若非兵船預伏探哨寇舶卒至何以禦之故健跳

戰艦之設不可一時而不戒者也昌國總沿海設備者六海中設備者十五定海總沿海設備自定海衛至大嵩港凡九海外設備自舟山螺峰巡司至沈家門寨凡十二臨海總守海岸者七守海港者八海甯總海岸設備者十海港設備者三自東關外龍王塘至西海口西海口南通大洋北近平湖係浙西之咽喉平湖之門戶也

台之飛雲橫陽館頭溫之松門海門甯之定海湖頭渡紹之王江杭之赭山龕山嘉之乍浦澈浦皆海濱門

戶

海汛春夏多東南風慮犯淮揚秋冬多西北風慮犯甯

紹

浙中海船于遠番皆能通之

北福洋烽火門寨設于福甯州所轄官井等哨當會哨者五小埕水寨設于連江所轄安鎮等哨會哨者三日南水寨設于莆田所轄冲心蒲禧崇武等哨當會哨四浯嶼寨設于同安大約當會哨者二南銅山水寨設于漳浦大約當會哨者二

閩寇入犯之冲首南澳次銅山次浯嶼次南日今扼其上流則南地可無慮外島在漳曰南澳在泉曰澎湖在興曰湄州在福曰海壇但澎湖遠在海外去泉二千里其山迂回有三十六嶼羅列如排牙然內澳可容千艘又周遭平山爲障止隘口進不得方舟今賊得先據所謂一人守險千人不能過者也又山水多石風信不常吾兵攻守頗難

三四月東南風汛番船多自粵趨閩而入于海南澳云蓋特走馬溪乃番船始發之處慣徒交接之所也附

海有銅山元鍾等哨守之兵若過其中不得泊其勢必趨于外浯嶼乃五澳地方番人之巢窟也附海有浯嶼安邊等哨守之兵若把守緊要港門不得泊其勢必趨于料羅烏紗乃番船候接濟之所也附海有官澳金門等哨守之兵若先守不得泊其勢必趨于圍頭峻上乃番船停畱避風之門戶也附海有深扈福金哨守之兵若先守又不敢泊其勢必趨于福興若越于福興計其所經之地在南日則有岱墜湄州等處在小埕則有海壇連盤等處在風火門則有官

井流江九澳等處此賊船之所必泊者也海洋之治必先嚴內地奸人接濟而後倭夷可靖

海防守南日山下北可以遏南茭湖井之冲南可以阻湄州岱墜之突扼要區也明景泰以來移其寨于莆田吉了地方南日棄而不守非計矣

廣東海防分爲三路東路爲惠潮二郡與福建連壤漳船通番之所必通潮爲嶺東巨鎮柘林南澳俱係要區而靖海海門蓬州大城諸所又皆跬步海濤所賴以近保三陽遠衛東嶺者也惠州海豐東南濱海其

捷勝平海甲子門皆瞬息生變然未有如柘林爲尤要也柘林乃南澳海道門戶據三路之上遊番舶自福趨廣悉由此入爲今計東路官軍每秋掣班必以柘林爲堡填固要津若遇颶霧塵霾尤宜加意中路廣州置省環海大洋風濤千里皆盜賊淵藪常考之三四月東南風汛日本諸島人寇多自閩趨廣柘林爲東路第一關鎖彼知有備不得泊其勢必越中路之屯門雞栖佛堂門冷水角老萬山虎頭門等澳而南頭爲尤甚今附海有東莞大鵬戍守之兵倘彼知

巡哨不敢泊其勢必歷峽門望海橫瑟山零丁洋仙女澳九竈山九星洋等處而西而浪白澳爲尤甚乃番舶等候接濟之所也今附海有香山所戍守之兵倘彼又不得泊其勢必至厓門塞門海萬戶山綱州等處而西而望峒澳爲尤甚乃番舶停畱避風之門戶也今附海有廣海衛新甯海朗所戍守之兵廣東三路莫甚於東路而中路次之西路高雷廉又次之三郡逼近占城暹羅刺諸番故高州東連肇東南憑溟渤神電所轄一帶海澳若連頭港汾州山兩家灘

廣州灣爲本府之南翰雷州突出海中三而受敵其遂溪湛州溷州樂民等四十餘隘固爲合衛三道門戶而海安海康黑石清道并徐聞錦囊諸隘所以合防海澳若廉州則尤爲全廣輕重海北扼塞兩有攸寄故兵符特劄于靈山達堡增屯于衛北西南雄郡如瓊爲廉之外戶

Blank page with vertical lines.

江防述略

清 張鵬翮 著

夫防海之道在於會哨而防江之道在於聯絡然而防江必先防海請先言夫會哨會哨者會兩省諸將各各帶領兵船交牌口號會哨於洋山也洋山者海道必由之要路也山周百里形如南箕中平如掌內有十八安島可藏海船數百山之麓娘娘廟在焉海水鹹不可飲唯山嶺一泉清淡可汲賊若入犯我欲窮追會哨必泊此中以避風汲水南至定海北至吳淞皆一潮可到蓋

江浙之交華彝之限也故舟山為浙江之屏翰而玉環
 鳳凰馬蹟馬墓等山輔之崇明為江南之屏翰而縣後
 匾擔竹箔送信諸沙輔之洋山又為江浙兩省之屏翰
 而陳錢壁下諸山輔之陳錢者中國海山之盡處也海
 賊擊空明而來風濤無際望見陳錢則喜中國之將近
 而必泊於洋山以避風汲水視風然後分船如遇東北
 風起必由下入陳錢馬蹟等山以犯浙江而流入乎蘇
 淞正東風起必由茶山西行以犯淮揚而流入乎常鎮
 然必發船于洋山洋山既為江浙之險要故防海之道

必須吳淞舟山二總兵各各命將帶領兵船往來會哨
 于洋山以交牌口號為驗若遇賊犯浙之中界則沈家

門

舟山

等處官將帶領兵船北截長塗三姑之路

金山衛之

東以浙西兵船為犄角馬墓等處官將帶領兵船南截

普陀青龍洋韭山之路以溫台兵船為犄角若賊泊浙
 之兩頭洞總兵官自烈港督師北截之於觀海洋七里

嶼參將自臨山洋督兵應援南截之於金塘崎頭洋以

石浦梅山港兵船為犄角

台州在天童山之東北

此浙江之海防

也若泊洋山侵茶山則南匯上海官兵出黃浦直搗茶

山爲正兵金山營青村所官兵出金山港由上中下鈞
山抵壁下以尾其後吳淞官將出吳淞江陳永子山以
犯其前劉河營官兵出竹箔沙爲奇兵崇明官兵塞縣
前縣後偏擔諸沙以截大江之口爲守兵此江南之海
防也賊犯江南而浙江官兵不至陳錢者罪在浙江賊
犯浙江而江南諸將不至馬蹟者罪在江南俱以交牌
口號爲驗遇賊則江浙官兵聯絡爲一併力掩殺或搗
其中堅或截其歸路或踵其後或犯其前毋使登岸入
江爲第一策此江浙海防之大要也然知防海而不知

防江脫有疏虞突入內地爲害不淺故聯絡江防又所
當講者也聯絡者聯兩江官將主客兵船犬牙交錯而
節制之也蓋浙江之險在海江南之要在江東連大海
北亘長淮中貫大江南則蘇松常鎮北則安鳳淮揚星
分碁列若賊入江則沿江兩岸上下千里無不可犯之
內地防守愈難 國家於此設立兩江巡撫設立主客
官兵皆所以鎖鑰金陵防護漕運其計甚善若彼此各
守汛地而不知聯絡置長江于度外卒然有警蹂躪內
地安望其風帆上下瞬息千里出奇制勝者哉愚觀夫

大江之險在崇明一沙當長江萬里之委流障大海諸洋之巨浪爲大江之砥柱實金陵之門戶也其入江之道有二北有縣後匾擔二沙南有竹箔送信二觜北道水淺南道水深截四沙之口更無入江之路矣大江之鎖鑰有四廖角營前兩沙相對海闊一百五十里爲第一重狼福兩山相對江闊一百二十里爲第二重江陰靖江相對江闊四十里爲第三重圖山與永生州相對江闊一十餘里爲第四重當事誠能聯絡四重官將多設兵船賊犯第一重則二三四重兵船以次漸進一重

不利則二重繼之以至三四重莫不皆然則未有不勦殺靡遺者也或曰諸侯有道守在四彝與其聯絡於江曷若先事預防會哨於海此真得防海之道而防江亦不外是矣

不代出矣
 海防述略
 卷一
 四
 事

海防述略

廣東

清 秀水杜 臻遇徐著

廣東列郡者十分為三路惠潮為東路省會廣州為中路高雷廉為西路東路與福建連壤而潮為嶺東之巨鎮焉柘林南澳俱係要區枕吭撫背之防不可一日緩而靖海海門蓬州大城諸所又皆跬步海濤所賴以近保三陽遠衛東嶺者也惠州海豐東南濱海其捷勝平海碣石甲子門皆瞬息生變儻柘林南澳失守是無潮

學海類編 卷之三十一 粵海防略
也平海碣石失守是無惠也而不知柘林之地尤爲南
粵海道門戶據三路之上遊番船自福趨廣悉由此入
舊例風汛之期各澳皆設戰艦秋盡掣回水寨此在他
澳猶可柘林去水寨一日之遠警報未易達倘賊視我
無備乘虛衝突不亦危乎故必以慎固柘林爲要而附
近城所戍卒互爲聲援斯爲勝筭焉至南澳當因廣交
界在大海之中乃明初起發居民遺棄之地嘉隆間倭
泊於此互市廣捕急則奔閩閩捕急則奔廣而海寇許
朝光吳平之徒巢穴于此故萬歷三年設副總兵以彈

壓之若廣州地雖中處而環郡大洋風濤千里皆盜賊
淵藪帆檣上下烏合突來接船屯哨可容緩乎嘗考諸
島入寇多自閩趨廣柘林設備遏其衝而不得泊勢必
越于中路之屯門雞棲佛堂門冷水角老萬山虎頭門
等澳而南頭爲甚或泊以寄潮或據爲巢穴附海有東
莞大鵬戍守之兵往來巡哨遇警輒敵必不敢泊此矣
勢必歷峽門望門大小橫瑟山零丁洋仙女澳九竈山
九里洋等處而西而浪白澳爲甚乃番舶等候接濟之
所也附海有香山所戍守之兵往來巡哨遇警輒敵則

亦不敢泊此矣勢必歷崖門塞門海萬斛山硠州等處而西而望峒澳爲甚乃番船停畱避風之門戶也附海有廣海衛新甯海朗所戍守之兵往來巡哨遇警輒敵則又不敢泊此矣夫其來不得停泊去不得接濟雖濱海居民且安枕而臥况會城乎其西路高雷廉三郡以倭寇東來言之似防守之責可緩然三郡逼近占城暹羅滿刺諸番島嶼森列遊心注盼防守少懈則變生肘腋滋蔓難圖矣按高州東連肇廣南憑溟渤一帶海澳若蓮頭港汾州山兩家灘廣州灣爲來府之南翰兵符

重寄不當托之匪人以貽保障之羞也雷州突出海中三面受敵其遂溪湛川漳洲樂民等四十餘隘固爲合衛三道門戶而海安海康黑石清道并徐聞錦囊諸隘所以合防海澳操縱反側者也若廉州則尤爲全廣重輕故兵符特劄于靈山達堡增屯于衛北海寇峒獠外彝之憂視三嶺獨勞焉西南雄郡瓊爲廉之外戶五脂腹心盡爲黎據郡邑封疆無不濱海若白沙石瓊館頭文昌海安海康對峙番島翻風突來防禦甚艱凡此皆西路所當汲汲經畫者也故其分守也東路則于柘林

學海類編 卷之三 三 事
設把總哨至豬頭礁與碣石會碣石設把總哨至大星
洋與南頭會而惠潮則有參將之設南澳又有漳潮副
總之設中路則于虎頭門設把總哨至三角州與廣海
會廣海設守備哨至黃麋門與北津會而廣州則又有
海防參將之設西路則于陽電設參將哨至赤水洋與
白鴿會白鴿門設把總哨至海安港與漳州會而漳州
則有遊擊雷廉則又有副總兵之設瓊州白沙塞則又
有把總崖州則又有參將之設所以備粵寇者如此


福建

八閩之地西北阻山東南濱海其鋒火之臺山小埕之
東湧海壇東岸南日烏邱浯嶼澎湖元鍾銅山皆島寇
必經之地故分布五寨以鎮之俱江夏侯所設也一曰
浯嶼水寨始設于海邊舊浯嶼山外有以控大小咀嶼
之險內可以絕海門月港之奸誠爲要區後遷入廈門
舊浯嶼棄而不守遂使番船南來據爲巢穴是自失一
險也今欲復舊制則孤懸海中旣鮮村落又無生理一
時寇來攻刦哨援不及兵船之設何益哉故與其議復
舊規孰若慎密廈門之控予以控泉郡之南境自岱墜

以南接于漳州哨援聯絡豈非計之得者哉一日南日水寨原設于海中南日山下北可以遏南菱湖井之衝南可以阻湄洲岱墜之隄亦要區也景泰以來乃奏移莆田縣之吉了仍以南日爲名舊南日棄而不守遂使番船北向泊以寄潮是又失一險也今之事體與浯嶼相倣一日烽火門水寨原設于福甯州三沙海中永樂間倭寇犯境議撥福甯衛大金所官軍防守秦嶼羅浮官井洋皆轄焉正統九年侍郎焦宏以其地風濤洶湧不便棲船徙今松山寨地方其後官井洋雖添設水寨

而沙埕羅江古鎮羅浮九澳等險孤懸無援勢不能復舊矣一日銅山水寨漳州府所轄也漳浦一縣最近海嶼聲水寨者二銅山西門澳爲把總水寨而元鍾則受其節制焉故今止以五寨爲名初水寨在井尾澳景泰間移今西北地方北自金石以接浯嶼南自梅嶺以達廣東險隄所係匪淺淺也况倭船自浙趨閩所必由宜巖遏其衝并絕慣徒之勾引接濟者則有以控八閩上遊之勢矣一日小埕水寨北連界于烽火南接壤于南日蓋連江爲福郡之門戶而小埕爲連江之藩翰也海

壇連盤雄踞聳峙若南屏然爲賊船之所必泊其所轄
閩安鎮北芟焦山諸巡司爲南北中三哨無事往來探
視有警協力出戰則此寨之設爲不虛矣番船自粵趨
閩而入于南澳粵雲蓋寺走馬溪乃番船始發之處慣
徒交接之所也附海有銅山去鍾等哨守之兵若先分
兵守此則有以遏其衝而不得泊矣其勢必拋于外浯
嶼外浯嶼乃五澳地方番人之窠窟也附海有浯嶼安
邊等哨守之兵若先會兵守此仍撥小哨守把緊要港
門則必不敢以泊此矣其勢必趨于料羅烏沙此番船



等候接濟之所也附近有官澳金門等哨守之兵若先
會兵守此則又不敢以泊此矣其勢必趨于福興若越
于福興計其所經之地南日則有代墜涓州等處在小
埕則有海壇連盤等處在烽火門則有官井流江九澳
等處此賊船之所必泊者也若先會兵守此則又不敢
以泊此矣來不得停泊去不得接濟船中水米有限人
力易疲將有不攻而自潰者况乘其疲而夾力攻之豈
有不勝者哉故其分守也銅山寨領以把總南哨至洪
淡巡司北哨至東鎮洋又于舊轄元鍾所增遊兵寨設

南澳把總領之分哨雲蓋寺走馬溪等處而聽節制于漳潮之總兵浯嶼寨領以把總南哨至舊浯嶼北哨至大岸山而又特于南路設副總兵兼轄起祥芝其底廣東界之信地南日寨領以把總南哨至金沙澳北哨至蘇澳與海壇哨會海壇則又增設把總領遊兵分哨觀音胡盧等澳會爲小埕之南藩小埕寨領以把總南哨至白大山北哨至西洋山與烽火哨會而又特于中路設參將兼轄起慊澳直抵泉郡祥芝之信地烽火門寨領以把總南哨至小西洋北哨至官澳而又特于北路

設參將兼轄起福甯直抵甯德縣廉澳之信地所以備閩寇者如此

浙江

兩浙日本舊時貢道在焉論列郡之海口則溫州之飛雲橫陽館頭台州之松門海門甯波之定海太液湖頭渡紹興之三江沙門杭州之赭山龕山嘉興之乍浦澈浦皆海寇規犯之地列郡之門戶也論洋海之要害則金盤之鳳凰山南麂山松海之大陳大佛頭昌國之韭山定海之舟山遠而陳錢馬蹟下八山臨觀之烈港海

甯之洋山許山皆洋寇必經之地沿海之藩籬也然溫州與閩境接壤寇賊揚帆必首當之惟先嚴莆門鎮下官嶼南臺之險以扼其來于此不戒而入內地則溫爲正兵而台爲應援甯區速宜戒備矣台州四塞之國南有桃嶼金竹北有桑州桐巖西有關山衛墅疊嶂層岡重關鳥道而且南去盤石楚門僅百五十里東南去松門僅百里東去海門僅八十里設或海寇棄舟登陸皆可卒至城下自海門而上者則一潮直達三面阻山一面瀕海孤懸于數百里之外孤危之勢誠可畏也務在

加力防守過溫而台則台爲止兵甯爲應援溫則爲後襲矣甯區之衝石浦昌國爲最石浦一城去昌國僅十里城下一帶水涯堪以栖泊戰船對面有山卽石浦舊城山外大洋有山名曰壇頭盜船出沒輒乘其地故閩寇南犯必由三門林門下灣門東門四路而入倭寇東犯必由牛欄基洞下門等處而入今策其最要則洞下門逼近石浦所城其港頗窄其潮甚急賊船進此必紆回罄折于兩岸夾山之下而石浦左連一山名打銅坑與洞下門直衝相對撥兵分據使寇艘不得飛渡所謂

學海類編 卷之三
以逸待勞此守洞下門之一策也三門去石浦頗遠與
台區未門海洋鄰界其港頗闊以諸汛稍緩之兵併力
隄防此守三門之一策也至下灣門外係壇頭大洋內
則舊城東門港闊潮急且與火爐頭對峙于火爐頭更
宿重兵與對岸舊城東門互相防擊此守下灣門之一
策也而其最要者則定海一城乃全浙門戶且東北一
隅山石參差每爲下塗捷徑倘賊舟揚帆直抵城下尤
宜備禦杭州則鼈子門者乃省城第一門戶石墩鳳凰
外峙乃第二門戶此外無山唯羊許獨立海中東接衢

洋西控吳淞江口爲第三門戶洋許二山有防然後石
墩鳳凰有蔽石墩鳳凰有蔽然後錢塘鼈子門可甯此
其大略也嘉區之南鹽海甯及乍浦澈浦梁莊等處海
以城爲垣城以海爲池去城不及半里登岸即可攻掠
所謂洋山許山者遠落大洋不知何處矣往者攻犯乍
浦慘不忍言顧議及浙海輒以甯紹台溫爲上游而嘉
區爲可緩不知嘉區西浙之門戶也故其分守也浙江
有六總金鄉盤石二衛設把總一南與福建烽火會哨
北與松門關會哨轄溫州沿海延袤四百餘里而節制

之以溫處之參將松門海門二衛設把總一南哨至蒲岐北哨至昌國石浦港轄台州沿海延袤五百餘里而節制之以金台嚴之參將昌國衛設把總一領本衛并在外前後錢爵四所及遊仙寨而以南起石浦馮家山北抵南湖頭爲信地定海衛設把總一領本衛并在外後所轄衢大嵩中中左五所而以南起湖頭渡北抵管界巡司及外海舟山爲信地觀海臨山二衛設把總一領甯紹地方西自三江所東至龍山所延袤三百餘里及在外金家島爲信地而皆節制之以甯紹之參將

海甯衛設把總一則浙江沿海一帶起自鼈子門直抵金山衛延袤五百餘里皆屬焉而節制之以杭嘉湖之參將所以備浙寇者如此

江南

江南東濱巨海北亘長淮中貫大江其與浙江連界者爲松江自金山衛至南匯所官軍各分信地而金山北衛松江南援乍浦尤爲要區若金山以東有翁家港蔡家港柘林滌缺等處南匯以北有四五六七八九團洪口川沙窪清水窪等處防守宜嚴萬一外守不固則黃

浦一帶又爲蘇松險要守浦乃所以守門戶也今吳淞江口卽爲黃浦口子故設兵一枝以防深入至于上海之高倉渡沈莊塘周浦閘港閔行華亭之葉謝曹涇張堰等處賊一登岸渡浦甚易防禦宜密然寇船之來必至海外太山停舶候齊則洋山之地外爲定海吳淞江會哨兵船之羽翼內爲海港把守兵船之捍衛矣蘇州沿海一帶險隘甚多常熟有福山港白茆塘太倉有劉家河七丫港嘉定有吳淞江黃窰港皆賊之通衢而東吳之門戶此則所謂一府之險要長洲則泖湖浩蕩吳

江則鶯湖相屬吳縣則太湖交通皆賊之徑道而腹裏之關隘此則所謂一縣之險要其次則福山以西有三丈浦斜橋以東有許浦金涇劉家河以北有新塘浪港茜徑吳淞江以南有寶山以東有老鸛嘴均之所謂險要而少次焉者况海濱數百里一望平坦非有山嵐險阻爲之扼塞皆可以泊船登岸兵力有限而防禦之計當先其大者以海邊惟福山爲最以腹裏惟勝墩爲最故劉家河吳淞江福山港舟師防守不可單弱白泖口七丫港黃窰港俱當預設戰艦庶與各港相爲犄角又

如賊自東南而來必由寶山吳淞江宜于吳家沙堵截之賊自東北而來必由三沙劉家河宜于營前沙堵截之則蘇之外防或可無憂至于風汛時月吳淞水兵統發勝墩平望以防嘉興突犯之寇吳縣水兵統發太湖以防蠡里突犯之寇長洲水兵統發周莊以防泖湖突犯之寇則蘇之內防或可無憂惟吳淞所爲水陸之要衝蘇松之喉吭提兵南向可以援金山之急揚帆北哨可以扼長江之險者也崇明孤懸海外又天生此一塊土以爲蘇州之屏障江海之鎖鑰者也若常鎮之所防

者在江而不在海海寇入江由江兩岸登陸之路廖角嘴營前沙南北相對爲第二重門戶周家橋與圖山相對爲第三重門戶緊守門戶堂奧自安若三門稍有疏虞至不得已而守金焦兩岸謂之下策矣故其分守也蘇松專防海常鎮兼防江由浙之乍浦以東則松之金山衛扼其衝于是有參將之設而若華亭之柘林上海之川沙則各設陸兵把總屯守之由松之黃浦以北則蘇之吳淞江口當其吭于是有總兵之駐劄把總之哨守遊兵把總之策應而若太倉之劉家河常熟之福山

學海類編 卷之三
港凡賊舟可入處則各設水兵把總堵截之至于崇明孤懸海中尤爲賊所必經之處舊設把總一員駐竹箔沙營而與營前沙之名色把總往來會哨又所以巡視海洋而警報港口也由蘇而常而鎮則于楊舍設守備西與孟河堡之官兵相哨望于圖山營設把總西與永生洲新設之遊擊相聲援又皆所以東堵江口而遙衛江甯也所以備蘇松常鎮之寇者如此

江北

江北局勢與江南浙福不同難恃舟師止仗陸戰狼山

當江海之吭而鹿角掘港皆揚之東南界也胸山據淮海之首鬱州嚶遊山皆淮之東北境也中包泰興之周家橋鹽城之射陽湖山陽之雲梯關廟灣等處此皆據守所當先者而賊入海之道有二其一曰新港卽所謂三江口蓋由江南狼山越儀真瓜州而入登岸則卞家墳周家墳稍折而東則揚州矣此可入以登岸亦可從以出海者也其二則蛤蜊麻線等港與沿北大海口大海口有水陸路南通廟灣與劉家莊姚家蕩俱爲大鎮賊若據此官軍屯于湯潮岸等處賊南尋新港路出不

得則必北尋大海口而出勢所必然若安東海州之東北有大北海不惟道里迂遠且砂磧甚多此不可運舟者也岬港新插港之東亦有北海砂磧亦多此但可從而入不可出者也是賊出海之路止有三途若其登岸之處則不一東則廖角嘴呂四場西則楊樹港徐沙營又西則狼山楊樹港北則新插港掘港皆其所從以登岸而入寇之路也故其分守也則江海淮三者並防廖角嘴之大河口突出東南則設把總沿而西若狼山爲通州門戶則設把總通州爲全揚之門戶則有總兵特

駐焉又西設周家橋把總以防泰興之衝犯又西設三江會口把總設儀真瓜州守備以防內地之突入皆意專防江其自海門而北爲岬港則設守備又自新插港轉而西北爲鹽城則設守備又西北爲廟灣則設遊擊皆以防東海一帶各港岸之登犯自雲梯關以東爲東海守禦所則設把總以防賊由海入淮之路又于楊州設陸營官兵以待調遣接應所以備淮楊寇者如此

登萊

登萊二郡凸出于海如人吐舌東南北三面受敵故設

三營聯絡每營當一而之寄登州營所以控北海之險也登萊二衛并青州左衛俱隸焉其策應地方語所則有奇山福山中前王徐前諸所語寨則有黃河口劉家江解宋蘆馬停阜河馬埠諸寨語巡司則有楊家店高山孫芥鎮馬停鎮東良海口柴葫海倉魚兒鋪高家港諸司其在海外則島嶼環抱自東北崆峒半洋西抵長山蓬萊田橫沙門鼉砬三山芙蓉桑島錯落盤銘以爲登州北門之護過此而北則遼陽矣此天造地設之險也然諸島雖近登州而居島中以取魚鹽之利者乃遼

陽之編伍非山東之戍卒也叫呶跳梁可畏而不可恃故北海之濱既有府治而復建備倭城于新河海口以爲屏翰且有本營之建焉而但建水寨于島嶼良有以也夫島嶼既不設險則海口所係非輕自營城以東若抹直石落灣子劉家汪平暢蘆諸處自營城以西若西工莊西山孫家海洋山後八角城後芝罘莒島諸處皆可通番船登突巖外戶以綏堂闔其本營典守之責乎登萊突入海中至文登縣尤其東之盡處也成山以東若旱門灘九峰赤山白蓬頭諸島縱橫沙磧聯絡潮勢

至此衝擊騰沸議者謂倭船未敢倖達然考之明初倭寇成山海側居民重罹其殃倭果畏海奚而有是哉故文登縣東北有文登營之設所以控東海之險也甯海威海成山靖海四衛皆隸焉其策應地方語所則有甯峰海陽金山百尺崖尋山諸所語寨則有青泉赤山等寨語巡司則有幸汪溫泉鎮赤山寨諸司透而北則應援乎登州迤而南則應援乎卽墨三營鼎建相爲犄角形勝調度雄且密矣其與江南省連壤者爲卽墨縣南望淮安東海所城左右相錯如咽喉關鎖倘海波告警

淮楊被刦則自淮達萊片帆可至也故卽墨所係較二營似尤爲要自大嵩鼇山靈山安東一帶南海之險皆本營控禦之責其策應地方語所則有雄崖膠州大山浮山夏河石洞諸所語巡司則有乳山行村栲栳島逢猛南龍灣古鎮信陽夾倉諸所司其海口若唐家灣大任陳家灣鵝兒栲栳天津灣顏武周睡松林全家灣青島徐家莊諸處俱爲衝要隄防尤難封守者可勿慎乎故其分守也自青之贛榆界而東于安東衛設守備分哨至萊之高密界而止萊自古鎮巡司而東于靈山衛

之沙溝設守備分哨逢猛以西之海口又於卽墨縣治南設守備分哨浮山以東之海口又東則于登之萊陽大嵩衛設守備又折而東北則于文登設守備以協防東南兩面之險又折而西北則于府治之北特有副總兵之駐劄設水陸兩遊擊分扼兩港岸前哨旅順以協防北海一面之險又西爲萊之西北界則設王徐寨守備防守白浪新河等九海口又西則于府治設遊擊南策卽墨北應王徐而海與青州之聲援接又西則于青州設遊擊南策安東北守唐頭營一帶而西與武德二

守備之聲援接所以備山東寇者如此

沿海全境

沿海自廣東樂會縣接安南界起歷海條粵爲文昌界鋪前港爲會通界神應港豐盈浦爲瓊州界麻頭浦呂灣浦爲臨高界田禾灣爲儋州界峩詐山爲昌化所界歷白沙營爲感恩縣界大洞天小洞天爲崖州界牙娘澳雙洲門爲凌水縣界七十二徑牙山淡水灣爲欽州界革木營烏雷山爲靈山縣界青嬰池楊梅池平江池爲廉州界邵州爲永安所界柳州爲康海所界潯州爲

學海類編 卷之二 專功
錦農所界調洲獨豬山爲石城千戶所界鋼洲小黃程
汾洲爲甯川所界青聚山羅浮峰爲神電衛界海凌山
爲雙海所界小獲山爲海朗所界中獲山爲陽江所界
大獲山爲新甯縣界西熊山鶚洲山爲新會縣界萬斛
山上川山爲順德縣界石岐峰爲香山縣界蛇西山大
南常山爲南海番禺界烏沙洋爲白沙巡司界九星洋
爲福永巡司界珊瑚洲渡杯山爲東莞縣界合蘭洲爲
大鵬所界馬鞏洲爲鐵岡驛界甯洲山桔州山爲惠州
界記心洋爲平海所界徐娘山爲海豐縣界大星尖山

捷勝所界吉頭峰爲碣石衛界前標峰爲甲子門所界
陶娘灣靖海島爲靖海所界大浮山玉嶼山爲潮陽縣
海門所界小柑山爲蓬州所界大柑山爲大城所界大
京山九猴山爲饒平縣界計五千里抵福建南澳山爲
元鍾所界歷侍郎洲石城嶼爲銅山所界歷鴻儒嶼沙
汭島爲陸釐所界大散嶼璧洲山爲鎮海衛界小散嶼
爲月港界舊浯嶼爲高浦所界嘉禾山大担山爲中左
所界小担虎頭山爲金門所界大登山小登山爲福全
所界大捕山小捕山爲永甯衛界呈埭峰懶窟峰爲崇

武所界沙塘灣爲惠安縣界灤嶼白嶼爲峰尾巡司界
湄洲山爲南泉寨蒲禧所界石獅峰小粵峰爲平海衛
界呈口三江口爲冲心巡司界網山王家嶼爲萬安所
界六湖山碧水島爲鎮東衛界踵門山爲蕉山巡司界
日嶼月嶼爲梅花所界卽會城三坡焦五虎粵爲連江
界下干塘四嶼爲定海所界花瓶爲北茭巡司界飛鸞
渡爲甯德縣界青山峰爲大金所界天千山丁家程大
俞山三星山流江爲福甯州界計二千里抵浙江懸中
峰爲蒲門莊士二所界歷長沙門大崑山爲金鄉衛界

鳳凰山爲平陽所界銅盆山爲沙園所界仙口峰飛雲
渡爲瑞安所界大衢山海安港爲海安所界霓島披山
爲甯村所界黃華港爲磐石衛界太巖頭爲磐石後右
界前山覆斗門爲蒲岐所界九眼塘斗山關爲三山巡
司界丫髻峰爲楚門所界臨門隘爲隘頑所界省梅坑
爲沙角巡司界大陳山石塘港爲松門衛界金青閘西
嶼閘冰豐閘皆朱文公所造爲新河所界金沙灘鐺焦
爲海門衛界海門港爲海門前所界五嶼爲桃渚所界
三門山爲健跳所界石蒲港爲前後二所界青苔灣爲

昌國衛界小目山爲爵谿所界西廚山爲前倉所界孝
順洋白塗爲大嵩所界大射山爲穿山所界洛茄山長
白山爲中左所界大魚灣爲長山巡司界招寶山中子
山爲定海衛界金家島爲甯波界邱家洋爲慈溪界金
塾浦爲龍山所界松浦港爲松浦巡司界橫山爲觀海
衛界破山浦爲三山所界化龍浦爲餘姚界臨山港爲
臨山衛界西海塘爲上虞界漁山蒙池臺爲紹興三江
所界鼈子山爲蕭山界和尚山栲門爲會城界茶浦門
爲海甯所界大衢山小衢山爲澈浦所界桑扶山爲海

甯衛界西海口馬蹟山北丁興殿前山淡水門爲乍浦
所界計二千七百里抵江南省三姑山爲金山衛界胡
家港爲金山巡司界上釣山中釣山下釣山大盤山爲
青村所界蒲島爲南匯所界陳前山茶山爲南贍巡司
界寶山爲上海界永字山分水焦海焦山綵淘港爲吳
淞所界浪岡山顧涇港爲嘉定界竺箔沙送信嘴小團
沙新安沙爲大倉界大陰沙管家沙爲崇明福州狼山
三槿口爲通州千戶所界塘家港海門島爲泰州界亂
沙新洋港爲鹽城界開山淮河口鶯山爲安東界妨山

高公島爲海州所界清河口巴頭河爲贛榆界旬島勞
山島爲安東界孤耆山爲石臼所界計一千八百里抵
山東青沈峰歷胡家峰爲高港巡司界沙嘴峰爲靈山
衛界黃埠峰爲夏河塞界洋河峰爲膠州界大勞山田
橫島爲鼇山衛界走馬峰爲卽墨界馬山爲浮山所界
旬島赤島爲雄崖所界吾島徐福山爲大山所界巨高
島爲大嵩衛界竹島爲海隅所界松島莫邪島漫鷄島
爲靖海衛界佛島爲津甯所界五壘島下勞山爲尋山
所界歇馬墩洛口堡爲成山衛界海牛島爲不夜城界

竇家峰爲百尺巖所界古陌頂爲威海衛界父島爲金
山所界新安堡戲山峰爲海甯衛界海鷄山爲竈司寨
界武家莊爲馬埠寨界洋山爲萊州界八角島盃蟻島
爲登州界劉家窪爲盧洋塞界沙門島爲解宋寨界單
山爲黃縣界桑島爲馬停寨界龜島爲昌邑縣界歆末
島爲壽光界都里鎮爲蒲臺界青島爲利津界黃島爲
賓州界直沽口爲寶坻縣界塔山爲盧龍衛塞界南半
洋山爲昌黎縣界計一千二百里抵遼東北半洋山爲
山海衛界蔬菜島爲中前所界牛車島爲中後所界孤

山爲中右所界向陽島羅兒島爲金州衛界石灘島爲
左所界東雲島黃駝島爲蓋州衛界屏風山爲復州衛
界鳳凰山爲中左所界女兒河爲中屯衛右屯衛界遼
河渡古寺島爲廣甯衛界麻出島平島爲海州衛界湯
站堡爲鎮遼所界臨江爲義州界計一千三百餘里爲
鴨綠江朝鮮界

